

CODINTO YACNOCQUIDON ISTE 1

Pabadon Codinto yacnocquidon iste dada uaid

¹ Pabado nebi. Nuquin Papa bunacpadomboen Esuquidistun ëbi chuibenequid icta cac nebi.

Esuquidistu tantiaquidbidi, Sostenes, nuqui con utsi caid ëbëd iquec. ² Aidbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quiash abided cuidadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caido mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

³ Matses icsaquid icsho cuidnushe quiash abided cuidadec Esuquidistu unëspanëdash, quequin abimbo tantiasho isun Nuquin Papan bëdamboen isaidquio nuqui nec. Adquido yec utsibobëd bëdamboec ma tabadpanuna.

Mibi tantiaquin Nuquin Papa chuided-chuidedaid

⁴ Mibi tantiaquin Nuquin Papa naden chuided-chuidedembi. Matses icsaquid icsho cuidnushe quiash abided cuidadec Esuquidistu unësaid chuibanac abi tantiaquido Codinto yacnocquido yanacsho bëdambocquidbimboecnuc mimbi isec, quec bëdambo iquebi, Papa, quequin chuided-chuidedembi. ⁵ Aden Nuquin Papan bëdamboen isaido icquin ambi bëdamboen tantiamiaidobidi mibitedi nec. Matses icsaquid icsho cuidnushe quiash abided cuidadec Esuquidistu unësaid mibi Nuquin Papan tantiamiac nëbi mibitedi bëdamboec tabadquin Esuquidistu chuibanoaic.

⁶ Esuquidistu tantiesabo iccondaiddi ëmbi Esuquidistun naid chuibanac tantiaquid mibitedi yanondac. Adquido yanash bëdamboec tabadquin ismequido mibitedi nec. ⁷ Adquido yec Esuquidistu choate caimbudec Nuquin Papan abi bëdamboec tabadaid tantiamiabi iccoshi queti-apimbo mibitedi iquec. ⁸ Aden abi bëdamboec tabadaid tantiamequin Nuquin Papan mibitedi chieshenquoio icmec ma Esuquidistupadquid icnu quequin mimbi caimbudacpadquio icpanuna aid padpidec choanuc. ⁹ Adquid mibitedi icmequin ambi Esuquidistubëd icquido icta caido ambi cuëmbanaido Nuquin Papan mibitedi icmiac. Adoshon mibi badedquoio Esuquidistupadquid yanenquiocsho isun chieshebi, quesa Nuquin Papa icquin abi mibitedi bëdambocquid icmebanec.

Esuquidistu tantiaquid cuëshëdabimboec chushcananquido

¹⁰ Adembidi chuinu. Tantiata. Esuquidistu tantiaquid nebi quec Nuquin Papan bëdambo icmiaid ënacimboec tabadenda. Adec tabadec Esuquidistu tantiaquid ut-sidedi tantiananec ma cuëshëdabimboec chushcananesa yampanuna. ¹¹ Esuquidistu tantiaquido Codinto yacnocquido chushcananec quec. Chido, Quëdoen shubunoësh choquido nëmbo ëbi isec choshon aden chiec. ¹² Mibi onquiaid chuinu. Tantia. Pabadon tantiamiaid nebi, quec chushquiabimboec utsi-utsiec tabadnubien; Apodosën tantiamiaid nebi, quec chushquiabimboec utsi-utsiec tabadnubien; Petedon tantiamiaid nebi, quec chushquiabimboec utsi-utsiec tabadnubien; Esuquidistun tantiamiaid nebi, quec chushquiabimboec utsi-utsiec tabadec.

¹³ ¿Esuquidistu tantiaquido cuëshëdmenuenda ëbi-padquidon chuibandiondash? Padenquoio. Naden chuinu. Tantia. ¿Matses icsaquid icsho cuidnushe

quiash ëbida cuidadec unëspanëda? Padenquoio. Adem-bidi ¿Esuquidistu tantiaquid nebi quequin ëbi mimbi chuishodambi mibitedi acten mentobandionda? Padenquoio. ¹⁴ Esuquidistu tantiaquid icsho Quidispobëdta Cayo aid daëdtsëqui naondambi quec tantiec tsadebi. ¹⁵ Utsi padenquoio iccondambi ma Pabadon ëbi acten mentondacsho aid tantiaquid nebi, quetiapimbo ma mibitedi icpanuna. ¹⁶ Ai, Estepanasën shubun icquidobidi acten mentondambi. ¿Utsidambi acten mentoponda? Padenquoio iccondambi. ¹⁷ Ëbi tantiaquido acten mentoban, Esuquidistun cainquoio yaqui Matses icsaid bedshunec abided cuidadec Esuquidistu cuesten dectanac unëspanëdash quequin chuibeneta, Nuquin Papan cac aden chuibenec nebi. Ëmbibi tantiaid chienquiocquin ma matses icsaquid icsho cuidnushe quiash abided cuidadec Esuquidistu cuesten dectanac unëspanëdash quequin ma utsibontsen tantiapanu qeshun chuibenec nebi.

Esuquidistu abitedi tantiaquidquo nadatiambocquin nabanquidquibidi

¹⁸ Nuquin Papabëd icquido icmenuec matses icsaquid icsho cuidnushe quiash abided cuidadec Esuquidistu unëspanëdash quequin chiac, ¿Adpecta iquec? quequin tantiesa yec Nuquin Papa yacno puduedtiapimbo iquec. Adec adquido onquenubi nuquien Nuquin Papa yacno puduedtequido yec Nuquin Papan nadatiambocquin nac matses icsaquid icsho cuidnushe quiash abided cuidadec Esuquidistu unëspanëdash quequin tantiec. ¹⁹ Abi yacno puduedtemaido chuiquin Nuquin Papan dada uamiampid nad iquec:

“Comapenen tantiaquidon ambibi dadpen tantiaidtedi ëmendambi.
Adquidon tantiatiapimbo yacpadembi natiamequin nabandambi,”

quequin Nuquin Papan dada uamiampid aidëmbi nëbi naid nec.

²⁰ Esuquidistu tantiesa ambibi tantiaidtedi naimëdan ¿mitsimbo adquido tabadpec? ¿Nidaid abubëd aidën icquidtedimbo mitsipadquidquio icpec? quequin isbanquin, Nadquio icpec, quequin comapenen adquidën tantiec. Aden tantiashic ambi tantiaid Nuquin Papan ëmiac ¿mitsimbo adquido tabadpec? ¿Midaquidën bëdamboen tantieque? Adquidën tantiaid tantianu, quec onquecuededquid ¿mitsimbo tabadpec Nuquin Papan aidon tantiaid ëmiac? Adquidon dadpen tantiaquimbi matses icsaquid icsho cuidnushe quiash abided cuidadec Esuquidistu unëspanëdash, quequin utsin-utsinquien tantiauidec. ¿Adsho isun Nuquin Papan abi yacnoda puduedmepadic? Padenquio iquec. ²¹ Nuquin Papan nadatiambocquin nac matses icsaquid cuidnushe quiash abided cuidadec Esuquidistu unëspanëdash quequin chuisho ambibi dadpen tantiaquidon tantiauidec. Èmbi tantiaidpenquio tantiatiapibi quequin tantiatiapimbo iquec. Adquido tantiatiapimbo icnubi ëbi yacpadquidon Esuquidistu chuibanac abi tantiaquid utsibo yanec. Nuquin Papa yacno puduedtequidtedi adquido nendac. ²² Adquidon aden tantianubi Nuquin Papan nadatiambocquin nabantequid iste bunquin isadaidbon tantiauidec. Quidieco matsesëmbien, Èbi ënden tantiec papuduedaid daëd uanu queboedëmbi Nuquin Papan chiaid tantiauidoaic. ²³ Adec tabadnubi matses icsaquid icsho cuidnushe quiash abided cuidadec Esuquidistu cuesten dectanac unëspanëdash, quequin ëbi yacpadquidon chuibanoaic. Adoquien, Nuquin Papan chomiaid nec, quequin isadaidbon cuesten dectanenquioctsenëdash, quequin tantienquio yec tabadec. Isadaidpembo, Esuquidistu mimbi chuiboed ëmbi tan-

tiacpadpenquoio iquec. Adoac mimbi Esus chuibanaid ëmbi ënden tantiaidbëdta daëd uatiapimbo iquebi quec tabadec. ²⁴ Adquidon tantiauidnubi isadaidbo utsi-utsiec adecbidi isadaidpembo utsi-utsiec Nuquin Papan cuëmbanaido icquin naden tantiec: Nuquin Papan tantiampicpadquiequi matses icsaquid icsho cuidnushe quiaash abided cuidadec Esuquidistu cuesten dectanac unëspanëdash. Aidi matses icsaquid icsho cuidnushe quiaash abided cuidtequid icmequin Nuquin Papan nadatiambocquin naid nendac, quequin nuqui tantiec. ²⁵ Abitedi tantiaquidquoio icquin ambi abentsëc tantiatsaid Nuquin Papan chiac dadpen tantiaquidën dëniactiapimbo iquec. Adecbidi, Nuquin Papan nadatiambocquin nainquiocquin bëdiactsëc natsëcnubi adomboen tantiaquin matsesën dëniactiapimbo iquec.

²⁶ Utsibo, ¿mitsipadquidquoio mibi icponda? Nadquid mibi icpondaque. Chuinu. Tanta. Daëdpactsëc tantiatsëcquido mibi icpondac. Namequidpenquoio mibi icpondac. Chuiquid dapan bacuëpenquoio mibi dadpen icpondac. Adquid icsho Nuquin Papan mibitedi tantiaquin, Con bacuë caid nec, quequin mibi cuëmbanon-dash. ²⁷ Ai, daëdpactsëc tantiatsëcquido Esuquidistu tantiaquido icsho Nuquin Papan cuëmbanaido mibitedi nec. Adquid ambi cuëmbanaido icnubi dadpen tantiaquid iquequi Esuquidistu tantiesa icsho Nuquin Papan cuëmbantemaïd nebi quequin tantiec natiaic ma shubiquiopanuna. ²⁸ Adembidi utsibon tantiauidtsaido Nuquin Papan cuëmbanaido neoaic. Adecbidi, ¿Ada matses utsi iqueque? Isnu quenquiocquin matsesën tantiambo yaid Nuquin Papan cuëmbantequid icnuc ²⁹ ëmbi comapenen tantiaquin nabansho Nuquin Papan cuënoshi quequin matsesën chuitiapimbo iquec. ³⁰ Nuquin Papan tantiamiac Esuquidistu tantiaquid mibitedi nec. Abi-

padquid Nuquin Papan Chomiaid Esuquidistu yec abi tantiaquidtedi Nuquin Papa bēdamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushe quiash abided cuidadec unēsaid isun Nuquin Papan cuidtiapimbo nuqui iquec. Icsaisa icsho Nuquin Papan aid bēdamboen isquin adomboembidi nuquitsen isoaic. Adecbidi, aidi abi yacno bēyucanec puduedash tsadacpadec adecbidi nuquitsen tabadoaindac. ³¹ Aden nuqui tantiaquin Nuquin Papan dada uamiampicpaden, Ĕbibi bēdambo ictiapimbocquid icsho mimbi bēdambo icmiaid nebi, Icbo, quequin ėmbi naid chienquiocquin Esusēn naidquio chuibanuna nuquitedi.

2

¹ Adembidi chuinu. Tantia. Mibi yacno nidshun dadpen tantiembi quenquiocquin daēdpacksēqui cuembo chuibanondambi. ² Esuquidistubēdta abi cuesten dectanaid chuinu quequin aiduidi mibitedi chuibanondambi. ³ Codinto yacnocquido dacuēdampambo iquec quequin uēdēequimbi mibi chuibanondambi. ⁴ Ĕmbibi dadpen tantiacpadomboen chuibanenquioccombi. Nuquin Papan Mayanēn tantiamiacpadomboen ėmbi chuibanubi aidĕmbi nadatiambocquin mibitedi tantiamiondash ⁵ ma Pabadon tantiamiacpadomboen tantiamioshi, quetiapimbo mibitedi icpanuna.

Nuquin Papan Mayanēn tantiamiaid

⁶ Nuquin Papan tantiamiac comapenen tantiaquin ėbi yacpadquidon chuibanoaic. Aden chuibeniac Nuquin Papan chiaid tantiabenecc papuduedquidon bēdamboen tantiec. Aden Nuquin Papan ėbi yacpadquid tantiamiaido matsesēn ambibi comapenen tantiacpaden

chuibanesambo nuqui nec. Adembidi matses chuiquid dapabon comapenen tantiacpaden chuibanesambo ëbi yacpadquido nec. Matsesën dadpen tantiaid uesadendac. ⁷ Adnubien Nuquin Papan comapenen tantiaquin, Esuquidistu chuibeneta, quenquiocpampidëmbi nëbi, Chuibeneta, cac Esuquidistu ëbi yacpadquidon chuibanec. Ushë uabi tabadquin matses bëdambo icmequid con mado nendac, quequin Nuquin Papan tantiapampic. ⁸ Esuquidistu nuqui bëdambo icmetequid Nuquin Papan chomiacsho adquid nec quequin chuiquid dapabon tantienquiopanëdash. Aidon, Nuquin Papan Chomiaid Esuquidistu nec, quequin abimbo tantiaquin cuesten dectanenquio ictsenëdash. ⁹ Aidpadquid chuiquin Nuquin Papan ëndenquimboshë dada uamiampid nad iquec:

“Nuquin Papan abi tantiaquido ambi cuëmbanaido abi yacno tabadmenun nacnenaid bëda tantiesan istiapimbo iquec.

Adecbidi Nuquin Papa yacno nadquio ictsiash, quetiapimbo matses iquec.”

¹⁰ Adnubien Nuquin Papan Mayanën Nuquin Papan abi yacnoshon bëdamboec tabadte nacnenaid iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquiec tabadaid nuqui tantiamiaoic. ¹¹ Matsesën ambi tantiacpaden chiabi yac utsin tantienquio iquec. Adembidi Nuquin Papan ambi tantiacpaden chiambocon matsesën tantiatiapimbo iquec. Abipadquid aton Mayanënuidquio tantiec. ¹² Con mayan ëbipadquidquio menenu quetiapimbo matses iquec. Nuquin Papambien abipadquid aton Mayan nuqui menec ma aidënquio abi yacno bëdamboec tabadaid nuqui tantiamapanuna. ¹³ Aden aidënquio tantiamiac

adomboembidi ëbi yacpadquidon chuibanoaic. Ëmbibi tantiacpadpenquiocquin Nuquin Papan Mayanën tantiamiacpadomboen chuibanembi. Adomboembidi ëbi yacpadquidon chuibanoaic. Aden Nuquin Papan chiaid chuibanac Nuquin Papan aton Mayan meniaidon tantiaquiec. ¹⁴ Nuquin Papan abipadquid meniacmaidon aidën chiaid tantiatiapimbo iquec. Aden Nuquin Papan Mayanën chiaid tantiatiapimbo icquin Nuquin Papan matses bédambo icmenu qeshun Esuquidistu chomiac matses icsaquid icsho cuidnushe quiash abided cuidadec cuesten dectanac unëspaneðash quequin aidon tantiatiapimbo icoaic. Ëmbi tantiacpadomboen Nuquin Papan chienquo iquec, quendac Nuquin Papan abipadquid meniacmaido. ¹⁵ Nuquin Papan Mayanën tantiamiaidombien naden utsibo tabadaid tantiec. Matses bédamboec tabadsho isun, Nuquin Papan Mayanën tantiamiacpadec tabadquidquo nec, quequin nuqui tantiec. Adembidi utsi icsamboec tabadsho isun, Nuquin Papan Mayanën tantiamiacmaid nec, quequin nuqui tantiec. Nuquin Papan Mayanën Nuquin Papan chiaid tantiamiacmaidon nuqui naic tabadaid isash Nuquin Papan chiacpadquiec tabadquid nec quetiapimbo iquec adquid. Adecbidi Nuquin Papan chiacpadpenquo yec tabadquid nec quetiapimbo Nuquin Papan Mayanën tantiamiacmaido iquec. ¹⁶ Nuquin Papan chuimiampid nad iquec:

“Nuquin Papa Abia Yampid yec abitedi tantiaquidquo nec.

¿Adquid Nuquin Papa icsho abi chuiquin

ismequid mitsicquid icpec? Adquid nibëdec.”

Nuquin Papan tantiacpadomboen aton Mayanën tantiamiaido icquin Esuquidistun tantiacpadomboen nuqui tantiabanec.

3

¿Esuquidistu tantiaquid utsi icsambo iquec, quecta ique?

¹ Adembidi chuinu. Adembi tantiata. Mibi yacno tabadquin Nuquin Papan chiaid tantiabenabicquid mibitedi icsho daëdpactsëc chuibanondambi. Codinto yacnocquido bacuë uidënabi yacbimboecquido nec queshun Nuquin Papan chiaid daëdpactsëc mibitedi chuibanondambi. ² ¿Nëbi tishaidënda pambid pepec? Padenquio. Mibitedi adquidbimboecsho tantienquio icnushe queshun Nuquin Papan chiaid daëdpactsëc chuibanondambi. Ënden iccondacpadquiobi mibitedi adquiobidi icoapec. ³ Esuquidistu tantiesa yec tabadondacpadec mibi tabadoaic. ¿Esuquidistu tantiaquid utsi icsambo iquec, quecta ique? Nuquin Papan Mayanën tantiamiacmaidpadquid yec nëishec chushcananec mibi. ⁴ Pabadon tantiamiaid nebi, quec utsi-utsiec chushquenubien; Apodosën tantiamiaid nebi, quec chushqueoaic utsi. Adec chushquec Nuquin Papan Mayanën tantiamiabi yacbimboecquido mibitedi nec.

⁵ ¿Mitsipadosho mimbi ëbi isponda? Adembidi, ¿Mitsipadosho mimbi Apodos isoaponda? ¿Ëmbembidambi mibi chuibamponda? ¿Ambembida Apodosëntsen chuibampanëdash? Padenquio. Tantia. Chuinu. Nuquin Papan chiacpadomboen Esuquidistu chuibenequid ëbi daëdi nebi. ¿Pabadon chuibanubi Nuquin Papan Esuquidistu tantiamiondashi quequinda mibitedishun tantiape? Ai, ëmbi adobanubi Nuquin Papan Esuquidistu mibitedi tantiamiondash. ⁶ Tiedën caniquid ëshë siabi yac dëyuctiapimbo yacbimboecquid icquin Codinto yacnocquido Nuquin Papan chiaid dadpen tantiatiapimbo iquec, queshun matses icsaquid icsho cuidnushe quiash abided cuidadaid Esuquidistu nec

quequin adquid chiaidba mibitedi chuibanondambi. Yuecash Apodotsen mibi yacno chopanëdash. Adec choshon tiedën caniquid dëyuctsash tanunquiocnoc canitiapimbo yacbimboecquido Codinto yacnocquido icnushe qeshun Apodosën chuibanoapanëdash. ⁷ Tied nitsinshun taneshcain tiedën caniquid canimesa icbo nec. Adquiobidi Nuquin Papan chiaid chuibanquid matses tantiamesa nec. Nuquin Papambien tantiamec. ⁸ Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Adembidi con tied taneshcaic cho cac nashunoaic. Adembidi abi neshcashunquid cuidoaic. ⁹ Nuquin Papan chiacpaden Esuquidistu chuibenequid Apodos nendac. Adembidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tiedbimboecquid mibitedi nec. Nuquin Papan shububimboecquidbidi mibitedi nec.

¹⁰ Nuquin Papa tabadte shubu uashunun buintad teshun abia tabëcacbimboen Esuquidistuba chuibanondambi ma matsesën tantianueshun. Buintad tabëcacbimboen Esuquidistu ëmbi chuibanan utsibon adomboembidi aidbidi chuibeneoaic. Bëdamboen chuibenenuequin ¿Nuquin Papan tantiacpadomboendambi chuibaneque? Tantianu, qeshun Nuquin Papan chiaid isted-istedtiad ambi chuibeneta caidon. ¹¹ Shubu uashunquidën shubu uidën uatequid nitsinan shubu uashunquid utsibo adomboen tabëcoanu qesa nec. Adquiecbidi Nuquin Papa tabadte uashunu qeshun buintad tabëcacbimboen Esuquidistu ëmbi chuibanan adquid nec, quequin utsi chuibantiapimbo utsibon iquec. ¹² Buintad tabëcaid tabadacimboecquido icmenuequin Nuquin Papan chiaidquio abimbo chuibanoaic. Utsimbien abipenquiocnoc chuibanoaic. ¹³ Adashien yuecash Esuquidistu

choanuc ¿Ēbi chuibanquidĕn ĕmbi chiacpadomboenda naoshe? Nĕdĕncadoquin tanu, quependac. ¹⁴ Aden nĕdĕncaquin tanac Nuquin Papan chiaid bĕdamboen chuiquidon chuibanac Esuquidistu tantiaquidombo yec buintad taudacmaid nidacbimboec abi nidendac. Adsho isun abi bĕdamboen chuibanquido Nuquin Papan menetequid nendac. ¹⁵ Adomboembidi utsibon abipenquio icnuc chuibanac Esuquidistu tantiatiapimbocquido taudaid bescashun secacbimboen secatequid nendac. Adnubi abipenquio icnuc chuibanquido tauditsenacbimboec abentsĕqui ambi chuibanaido nibĕdnuc Nuquin Papa yacno puduedendac. Adquido Nuquin Papan menetemaido nendac.

¹⁶ Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatiapimboda mibitedi icpe? ¹⁷ Ai, Nuquin Papa tabadtequidbidi mibitedi nec. Adquid icsho mibi icsabudmenuequido Nuquin Papan ĕnenquiocquin comapenen cuidendac. Abi tabadtequid Nuquin Papan cuĕmbanaido ambi bĕdambo icmebanaidobidi nec. Esuquidistu tantiaquido Nuquin Papa tabadtequid nec caindac.

¹⁸ Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuec Esuquidistu tantiesan tantiacpadec tabadenquiocquin Nuquin Papan tantiacpadomboen tantiaquiota. ¹⁹ Esuquidistu tantiesan tantiacpadquiec tsadquidĕn ĕbi yacno tabadte tantiatiapimbo iquec, quequin Nuquin Papan tantiec. Aden tantiaquin ambi dada uamiampid nad iquec: “Ambibi comapenen tantiaquin nabanaid ĕnabi icnubi icbo unĕsendac.” ²⁰ Adecbidi: “Adquidĕn tantiaidbidi ĕnĕdtequid nec,” quequin Nuquin

Papan tantiec. ²¹ Ad icnuc, Pabadon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. ²² Aidën bacuëbo icquin mibitedishun con utsi ëbi caic. Adembidi Apodotsen mimbi adoaic. Adembidi Petedotsen mimbi con utsi caoaic. Nidaid abubëdta uashumbic aidënquiocquidtedimbo uabanquid yec aidtedishun icbo Nuquin Papa nec. Adecbidi aton bacuë mibitedi icnuc aidtedimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aidtedi mitsanabidi nec. ²³ Mibitedishun icbo Esuquidistu nec. Esuquidistun icbo, Edoen, aton Papa nec.

4

Esuquidistu chuishunquido

¹ Icbo Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiata. Ënden Abia Yampidën Nuquin Papan Esuquidistu chuibeneta, quenquiocpampidëmbi nëbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiata. ² Nuquin Papan, Esuquidistu chuibeneta, cacpadomboen niaquenuiocquin ëbipadquidon chuibenetiad. ³ Nuquin Icbon, Èbi chuibeneta, caid ëbi icnuc ¿Pabadon bëdamboenda chuipec? quequin tantianuna, ¿mimbi cactabi dacuëdpe? Padenquio. Adembidi, Nuquin Papan chiacpadomboen chiombi, quetiapimbo iquebi. ⁴ Ambi chiacpaden niaquenuio iccombi, quetiapimbocnobi abitedi isquidquio abitedi tantiaquidquio Nuquin Icbo icquin

ëbi chuibanec bédamboec tabadsho isun aidën chierendac. Adembidi ëbi chuibanec icsamboec tabadsho isun chiendac. ⁵ Icsamboen natsiash, quec tsadenda. Nuquin Icbo choashun icsambocquid cuidendac, quequin cainta. Aidëmbi choashun matses icsamboen ismec tabadaid abi ompoec tabadaidbëdta chuibanshun cuidendac. Adembidi, matsesën ëquëducshun tantiaid chuibanquin cuidendac. Adembidi, utsibo bédamboec tabadaid chuibanquin chuioaindac, Bédamboen mimbi naoc, quequin.

⁶ Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantiabanec, Pabadopadquid utsi nibëdec, quesa ma icpanuna. Adecbidi, Apodospadquid utsi nibëdec, quesa ma utsibotsen icpanuna. Nuquin Icbopadquid utsi nibëdec, quequin tantiec tabad. Adecbidi, Codinto yacnocquidopadquid utsi nibëdec, quenda. ⁷ ¿Mitsicquidën adquid mibi icmëbampashba? ¿Abembida mibi adquid icpeba? Nuquin Icbon tantiamiac nabanash, ¿atotsi quiash, ëmbi tantiacpaden naombi, quepe mibi?

⁸ Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nëbi mibitedishun tantiauidpec. ¿Adpecta Nuquin Papan bédambo icmiaido tabadpadic? Nuquin Papa yacno ënden puduedac bimboec yash chuiquid dapa nebi, quiac bimboec mibitedi tabadpec mibi Esuquidistu chuibanquidtedi adec tabadtiapimbo icnubi. Mibitedibëd ëbi yacpadquido ëbi chedo ënden chuiquid dapa yacpadquido icmiondac, Cuishon, quetsiabi. ⁹ Adecbidi, Bédambo iquebi, quec mibi tabadnubi naden tantiec tsadebique. Tantia. Chuinu. Ëmbi chuibeneta caido unëseque. Is, Nuquin Papa

quiacbimboecnuc ambi abi yacnoshon uaido mayan bēdabobēdtan matsestedishun isbededacbimboecquid nebi, quequin ěmbibi tantiec tsadebi aden isbededec aido tabadenquiocnobi. ¹⁰ Esuquidistu chuibenequidon chuibansho tantiauidash, Pabiate icsachitashien nec, quequin mamēnshumbededashic Codinto yacnocquidon ambibi tantiaquin chuibansho tantiaquidquio nec, quepec Esus tantiesabo. Adecbidi, utsibo dacuēdampambo iquec, quiash uēdēequin Esuquidistu chuibenequidon Nuquin Papan chiaid chuibanubi cuesambo yacbimboen mibitedishun chuibampec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec. ¹¹ Esuquidistu chuibenequid yequi pistsēc petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactsēcquid dasiuidquid nebi. Adquiecbidi Esuquidistu chuibenequid utsibo iquec. Utsin mēyanded-mēyandedaid nebi. Quenenash iquenquio icquin capucuenequin Esuquidistu chuibenec nebi. ¹² Con pete bednuequin shubumpi nacnenquidquio iquec chonoadsho isquin utsibon mamēnshunaid nebi. Aden mamēnshunubi chonoadebi. Adecbidi Pabado icsambocquid nec, quequin chiaqui aido cuidenquiocquin bēdamboen ista, Papa, quequin aido chiemi. Utsin mēyanaqui dayacquio yec cacuidanesa nebi. Adquidbidi Esuquidistu chuibenequid utsibo nec. ¹³ Adembidi, utsin ěbi mua uaquin chiaqui cuidnanenquiocquin bēdamboen chiemi. Adembidi ěmbi Esuquidistu chuibeniaqui icsactsēcquid nec, quequin ambi secanu caidbimboecnuc ěbi ispec. ¹⁴ Adecbidi, Bēdambo iquebi, quec mibitedi tabadnubi mēyamboc tsadebi. Adec ěbi tabadaid ěmbi chiac Codinto yacnocquido unēsquio yampec, quenquiocquin ěbi tabadaid mibitedi tantiamenuen dada

uaombi. Pabadon chiaid abimbo iqueque. Bëdamboec tabadnuna mibi camenuen dada uaombi, con bacuëbo. Mibi tantiac unësquio iquec. ¹⁵ Mibi chuibanquid utsi dadpen nëbi icnubi Esuquidistu ëmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ëbia yanshun Esuquidistu chuibanac mibitedi Esuquidistu tantiaquido yampondac. Ëmbi chuibanacpaden chiaid tantiaquido con bacuëbo ëmbi caidtedi nec. Adquid mibitedi icnuc papa nebique. ¹⁶ Ëmbi nacpadomboen naic tabadta quequin mibitedi chiembi. ¹⁷ Mibi ëmbi nacpadquiec tabadte tantiamenuquin Timoteyo mibi yacno nidmembi. Aidi ëmbi chuibanac Esuquidistu tantiaquid icpondash. Adquid iccondacsho ëmbi con mado caid aidi nec. Aidi Esuquidistu tantiaquidquio icquin utsi-utsiec yacnoshon ëmbi chuibeniacpadomboen chuibanoaquin Timoteyon mibi padpiden tantiamendac. Esuquidistu tantiaquid utsibo iccuededacnoshon chuibanacpadomboen ismequin chuibanquid aidbidi nec.

¹⁸ Mibi utsi-utsiec Pabado choainquio iquec quequin abimbo tantiacbimboen chuibanec. ¹⁹ Aden adquidon chuinubi Nuquin Papa bunuc badedquio mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindambi. ²⁰ Nuquin Papa tantiaquido ambibi tantiacpadec onquesa nec. Nuquin Papan Mayanën tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanec tabadquid nec. ²¹ ¿Mibi yacno puduedshun atotsimbi adquid napeque? Chui. ¿Cuesnu quiacbimboendambi adquid comapenen chushcaquin tantiamepe? ¿Adenquiocquindambi ëbëd icquid nec quequin chuibanquin adquid tantiamepe?

5

Esuquidistu tantiaquid ambi chudtemaid chudquid cacumeta caid

¹ Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaidpembo nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec. ² Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash ünësquio icquimbi aidi cacumepatecnëdan. ³ Mibëd ictiapimbo yequi mibëd yacbimboecquin dada uaquin icsaquid cacumetiadquidi mibi nenëdac quequin chuibanombi. ⁴ Esuquidistu tantiaquid nuquitedi nec, quec mibitedi iccuededec Nuquin Icbo Esuquidistun tantiamiacpadomboen Pabadon naden natsiash quequin ⁵ icsaquid nidme ma Satanasën mëyanac icsa bunesa yanacsho Nuquin Icbo Esuquidistu choashun ma abi yacno yuedpanuna.

⁶ Esuquidistun ënden bëdambocquid icmiaidtedi nebi, quenda. Icsaquid abentsëc mibëd tabadquin abi icsamboec tabadaid ismiac acte maisac bimboec mibitedi adquiobidi ictsiac. ⁷ Enden mibitedi Esuquidistu tantiesabo yec icsaquin ismec maisaccondacpadec maismane qeshun icsaquid nidmeta. Èbi cuidmenquiocnoec abided cuidadec Esuquidistu ünëspanëdash, quiash aid icsaisa yacpadquiec tabadta. ⁸ Aden ambi naid tantiec icsaondacpadpenquio yec ma tabadpanuna. Aidquio tantiemi, quec abimbo tantiadonec ma tabadtenapanuna.

⁹ Ambi chudtemaid chudquidbëd iccuededenda, quequin ënden dada uaondambi. ¹⁰ Esuquidistu tantiesabëd iccuededenda, quenquiocquin Esuquidistu tantiaquid

adquid icsho isash iccuededenda, quequin dada uaondambi caimbi. Ambi chudtemaid chudquid Esuquidistu tantiesa dadpen iquec. Adecbidi, utsin na bunquin mua uain bedquid dadpen iquec. Adecbidi, matsesën Nuquin Papan uaidbimboecnuc nacnenaaid tantiaquid Esuquidistu tantiesa dadpen iquec. ¿Adquido ismane quiash mit-simbo mibi tabadpe? Nuquin Papa yacno adquid nibëdec. Nuquin Papa yacno nidash icsaquid isenquio yec mibi tabadendac. ¹¹ Esuquidistu tantiaquid nebi, quequid icsadenesho isash adquidbëd iccuededenda caimbi. Esuquidistu tantiaquid nebi, qeshun ambi chudtemaid chudquin ënesabëd iccuededenda. Adecbidi, muaquin bedbanquidbëd iccuededenda. Adecbidi, Esuquidistu tantiaquid nebi, qeshun matsesën Nuquin Papan uaidbimboecnuc nacnenaaid tantiaquin ënesabëd iccuededenda. Adecbidi, Esuquidistu tantiaquid nebi, qeshun ambi tantiacpadpenquiocquidën chuisho mamënshumënquin ënesabëd iccuededenda. Adecbidi, Esuquidistu tantiaquid nebi, qeshun cuesanquin ampequin ënesabëd iccuededenda. Adecbidi, Esuquidistu tantiaquid nebi, quiash ëmbi chuibocpadquid icsaquidbëd iccuededenda. Adembidi aidobëdtan penda.

¹² ¿Esuquidistu tantiesa abi icsaid chuiquin cacumeta, quequindambi chuipe? Padenquio. Esuquidistu tantiaquid mibëd icquid icsadenequin ënenquiocsho isun Nuquin Papan chiaid comapenen tantiaquin mibi icsaid ënta, quequin chui. ¹³ Nuquin Papambien Esuquidistu tantiesa icsaid chuiquin cuidendac. Mimbi Esuquidistu tantiaquid icsadenequid cacumeta.

6

Ëbi chushcananaid tantiashun mimbi tantiacpaden chui caid

¹ Esuquidistu tantiaquid daëd nëishash chushcananec, queoaic. Adquid chuinu. Tantia. Nëishash chushcananash Esuquidistu tantiesa yacno nidshun, Èbi chushquiaid chuisho tantiashun ¿midapaden mimbi chieque? Èbi chui, quequin mimbi chuipec. ¿Atotsi quiash Esuquidistu tantiaquid yacno niddiadquidi Esuquidistu tantiesa yacno nidshun mimbi adquid chui, cape? ² Yuecshun, ¿Midapaden mimbi Esuquidistu tantiesan naid chieque? Tantuanu. Chui, abi tantiaquido Nuquin Papan caquien ¿nuqui chiacpaden aido Nuquin Papan cuidendac, quequin tantienquioda mimbi icpe? Yuecshun tantiesan naid chiembi, qeshun ¿Atotsieshun Esuquidistu tantiaquidbëd chushcananash tantiesa yacno nidshun mimbi chuibampe? ³ Yuecshun, ¿Èmbi uaido mayanën naid midapaden mimbi chieque? Tantuanu. Chui, Nuquin Papan caquien ¿nuqui chiacpaden aido cuidendac, quequin tantienquioda mimbi icpe? ⁴ Adquidon naid ëmbi chiacpadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daëd nëishash chushcananasho tantiashun, Esuquidistu tantiesa yacno nidshun, Èbi chushquiaid chiacsho mimbi tantiacpaden ëbi chui, mimbi capec? ⁵ ¿Esuquidistu tantiaquid utsibo nibëdpecta ictic? ¿Esuquidistu tantiaquidën icsamboen chuinushe qeshunda Esuquidistu tantiesa yacno nidshun, Èbi chushquiaid chiacsho mimbi tantiacpaden chui, mimbi capec? ¿Bëdamboec tabadaid Esuquidistu tantiaquid utsibon comapenen tantienquioctsiash, quequinda mimbi tantiape? ⁶ Mibipadquid Esuquidistu tantiaquid utsibo yacno nidenquio yec mibipadquidpenquio Esuquidistu tantiesa yacno nidshun utsibëd chushcananaid mimbi chieque.

Adenda.

⁷ Ēbi chushcananaid ěbi daēdshun chiacsho tantiaashun mimbi tantiacpaden chui. Tantianu, quequid mibēd icnuc Nuquin Papan bēdambocquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiash nēishash chushcanampe? Adem-bidi, Esuquidistu tantiaquid utsin muaquin mitsana bedacsho isash ¿atotsi quiash nēishash chushcanampe?
⁸ Cuidnante bunec mibi adpec. Naden natiad. Ēbēd chushcananquid Esuquidistu tantiaquid nec, quec abi cuidte bunenquio yec abi yacno nidshun abi icsaboed tantiamequin Nuquin Papan chiaid chuiban.

⁹ ¿Icsadenequin ěnesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquiec tabadec icsate bunquid yec Esus tantiaquid nebi quec mibibi mua uadenda. Ambi chudtemaid chudquin ěnesa Nuquin Papa yacno yuedtemaid nendac. Adem-bidi, Nuquin Papan uaidbimboecnuc nacnenaid tantiaquin ěnesa abi yacno yuedtemaido nendac. Adem-bidi, ambi inacmaid chudquido abi yacno yuedtemaido nendac. Adem-bidi, aton bēnēpen chudmequin ěnesa, adecbidi dada daēd chichudnanquin ěnesa, adecbidi chido daēd dachudnanquin ěnesa Nuquin Papa yacno yuedtemaido nendac. ¹⁰ Adem-bidi, ampequin ěnesa Nuquin Papa yacno yuedtemaid nendac. Adem-bidi, muaquin utsin na bedquin ěnesa, adem-bidi, ambi tantiacpadpenquiocquidēn chuisho mamēnshunquin ěnesa, adem-bidi, cuesunianquin ampequin ěnesa. Adquido Nuquin Papan ambi abucshun nacnenaidēn tabadtemaido nendac. ¹¹ Ēnden mibi adquio iccondaidi nēbi utsi-utsiec padenquio icsho isash Nuquin Papa mibi cuidenquio yec mibi icsaid bēpiscudac. Adem-bidi, Nuquin

Papan mibitedi bēdambo icmebanuequin abipadquid aton Mayan mibitedi meniac. Aidi meneshun Esuquidistu icsapenquiocquid isacpaden Nuquin Papan mibitedi isoaic.

Ĕmbi chudtemaid chudmane qeshun adquid isuidteneta quiaid

¹² Ĕmbi natemaid naden nata caid nibēdec qeshun naic bēdamboquid ictiapimbo iquebi, quiash padenquio yec tsadebi. Aden nabanquin ĕntiapimbo icmane quiash padenquio iquec tsadebi. ¹³ Matsesēn chebudaid pucu yacno budash dada bēdambo icmianquid nec. Yuecash matsesēn dada chodquetequid nendac. Padnuen, ĕbi tabadte ma icpanueshun Nuquin Papan matses uapampic. Abi tantiaquid abi tabadte iquec. Adecbidi adquid-bēd Nuquin Papa iquec. Ad icnuc mimbi chudtemaid chudquid icta, quenquio Nuquin Papa icpampic. Ambi chudtemaid chudquid Nuquin Papa tabadte ictiapimbo iquec. Aden naquid chian anēdēnquequid nēsecatequid nendac. ¹⁴ Nadatiambocquin Esuquidistu Nuquin Icho Nuquin Papan uincuemepanēdash. Aidēmbi nuquitsen abi tantiaquid icsho uincuemendac. ¹⁵ ¿Abi tantiaquid icquin, Esuquidistubēd daēdash tabadquid nebi, quequin tantienquioda mimbi icpe? Ai, aibēdi daēdtequid nuqui nec. ¿Adquidbēd daēdashtabi icsaquidbēd daēdoape? Padenquio iquebi. ¹⁶ ¿Dadpen chudmequid chudash daēdacbimboecquid nec, quequin mibitedishun tantienquioda icpe? Aid daēdi dada abentsēc yacbimboecquid nec, quequin Nuquin Papan dada uamiampid nec. ¹⁷ Nuquin Icbobēd daēdaidien Icbon tantiacpadquiec tabadquid nec.

¹⁸ Ĕmbi inacmaid chudmane qeshun chido utsi isuidteneta. Padenquio yec icsaquidbēd daēdquid mibi iquendac. Ambi chudtemaid chudquid aton namibēd

ëquëducuësh daëdaid nec. Nami umanucuësh icsaid namibëd daëdtiapimbo iquec. ¹⁹ Nuquin Papan Mayan tabadtequid Esuquidistu tantiaquido nec. ¿Nuquin Papan ëbëd tabadmiaid abipadquid nec, quequin tantienquioda mibitedishun icpe? Ëbibi nuquin icbo nec, quetiapimbo matses iquec. Adecbidi, Con icbo nibëdec. Ëmbi tantiacpaden naimbi, quetiapimbo mibi iquec. ²⁰ Nuquin Icbo cuesten dectanac matses icsaquid icsho cuidnushe quiash abided cuidadec unësquid Nuquin Papan icmiac abi tantiaquid yec aidën na mibitedi nec. Adoaidi ambi chiacpaden ismec bëdamboec tabadteneta.

7

Dada chidobëdi daëdaid

¹ Nëbi mimbi dada uaboed isombi. Aid isun ëmbi tantiacpaden chiembique. Tantiata. Chido inquid dadatedida ictiad quequin mimbi tantiapec. Padnuen, Chido benquio iquembi, qesho chido inta cainda caimbi mibi. ² Esuquidistu tantiesa yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiash chido abentsëc inquid dada ictiad. Adecbidi dada abentsëcshun inaid chido ictiad. ³ Con chido ëmbi inaid nec, quequin aiduidi chudquid icta. Adecbidi con bënë ëbi inquid nec, quequin aiduidi chudmequid chido nec. ⁴ Chidon dada daëdash aton bënë dadabidi nec. Adecbidi dadan dada chidon dadabidi nec. ⁵ Aid daëdi daëdabi yacbimboec, Padi, quenda. Adboedi, Nuquin Papa chuinuec nëidtedi ushquin padenquio nuqui iquec, qeshun ënta. Aidtedec ushquin padenquiocshon, Ëmbi yuen ëntiapimbocsho isun Satanasën icsamenushe qeshun padpiden nata. ⁶ Ënta quenquio iquebi. Nëidtedi ushquin padenquio iquembi quiash mibi daëdi aidtedecuidi ushec ënëdta caimbi. ⁷ Padnuen, chido inesa ëbi yacpadec dadatedi icpashun. Dada utsi-utsiec Nuquin

Papan icmiacpaden chido inquit icnubi utsi-utsiec chido inesa iquec.

⁸ Chido inesa ěbi tabadacpadec dada utsitedi tabadec bĕdambo ictsiash. Adecbidi dadan inaidpen bĕdambo ictsiash chido. Dada bĕnua adecbidi bĕdambo ictsiash. ⁹ Adquid icquin isuidtiapimbo yec comapenec chudte bunquin chido inta. Adecbidi chido bĕnua dada isuidtiapimbo iquec dadan inaid icta.

¹⁰ Daĕdash niamĕnenda. Ĕmbibi chienquiocquin Nuquin Icbon aden chuinedacpadembi chiembique. Tantia. ¹¹ Min bĕnĕ nianash utsin inaid iquenda. Dadan inaid icnu quec mimbi niamboedĕn inaid icoata. Adembidi chido inquit min chido bunenquiocquin abi icsaid dada uashun ismequin nidmenda.

¹² Nĕbi Nuquin Icbon naden chuiban cainquiocnobi ĕmbia Esuquidistu tantiaquid icquin Esuquidistu tantiaquid utsibo ĕmbi chuibocpadembi mibitedi chuiobambique. Tantia. Dada aton chidobĕdi Esuquidistu tantiesa icboedi aton bĕnĕ Esuquidistu tantiaquid yanuc aton chido padenquio yec, Con bĕnĕ nianu, quenquio ictsiash. Adquid icsho isash. Con chido icsambocquid nec, quenquio yec abĕdi tabadquid bĕnĕ. ¹³ Adecbidi chido utsi aton bĕnĕbĕd Esuquidistu tantiesa icboedi aton chido Esuquidistu tantiaquid yantsiash. Aden Esuquidistu tantiash, Con bĕnĕ icsambocquid nec, quenquio yec bĕnĕ nianec nidesa chido. ¹⁴ Esuquidistu tantiabi yec daĕdacadec aton chido Esuquidistu tantiaquid yanash aidbĕd abentsĕc yac bimboec tabadec bĕnĕ. Adecbidamboec tabadsho isun Nuquin Papan chido bĕdamboen tabadmequin bĕnĕtsen bĕdambo icmebampec. Chido Esuquidistu tantiaquid icquin aton bĕnĕ padenquiocnobi aton bacuĕbo tantiec, Icsambocquidĕn bacuĕbo nec, utsibo quenushe quiash bĕnĕbĕd abentsĕc yac bim-

boec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuëbo tantiec aton chido Esuquidistu tantiesabëd tabadquid dada. Adec abentsëc yac bimboec tabadsho isun, Bëdambocquidën bacuëbo nec, quequin utsibon ispec.

¹⁵ Utsimbic ambi bedboedën aton chidon Esuquidistu tantiaquid isun aton chido nidta catsiash. Adoaquien, Mibëd tabadte bunebique. Ëbi nidmenda, quetsiash chido bënë caic. Adoaqui, Nidec nid, cac cacuidenquio yec nidquid chido. Chido utsibic aton bënë Esuquidistu tantiaquid yansho isash, Mibi nianu, quetsiash. Adoaquien, Mibi unësquio iquec, quetsiash bënë.

¹⁶ Adnubien dadan nidta caid aton chido Esuquidistu tantiaquid yec bëdambocquid icsho isash Esuquidistu tantiaquidtsen yantsiash bënë. ¿Adquid yantsiash, quequin tantienquioda mimbi icpe? Adecbidi, chidon nianu caid aton bënë bëdambocquid icsho isash Esuquidistu tantiaquid chidotsen yantsiash. Adecbidi ¿Adquidtsen yantsiash, quequin tantienquioda mimbi icpe?

¹⁷ Mibi Esuquidistu tantiaquid yanash Nuquin Papan tantiacpadec tabadnu quiash adequi tabadta. Adomboembidi Esuquidistu tantiec iccuededquid utsibo chuibanombi.

¹⁸ Esuquidistu tantiesa shui dëbid dëteshunaid yec Esuquidistu tantiaquid yanash ëbi shui dëbid dëteshunacmaid bimboecnuc nacnemenu quenquio yec tabadta. Adecbidi, Esuquidistu tantiesa shui dëbid dëteshunacmaid yec Esuquidistu tantiaquid yanash shui dëbid dëtemenu quenda. ¹⁹ Shui dëbid dëteshunaidta nec, quenquio yec Nuquin Papa tsadec. Adecbidi, Shui dëbid dëteshunacmaidta nec, quenquio yec Nuquin Papa tsadec. Adquid nec quenquio yec, Ëmbi chiacpadomboen nadenequidta nec, quec Nuquin

Papa tantiec tsadec. ²⁰⁻²¹ Adec Nuquin Papa tantiec tsadnuc yua Esuquidistu tantiaquid yanash yuapen icnu quenquo yec tabad. Adecbidi, utsin yuapenquo yec utsin yua icnu quenquo yec tabadoa. ²² Yua Esuquidistu tantiesa icboedi Esuquidistu tantiaquid yansho isun, Yua nec, cainquo icquin Nuquin Icbon cuënendac. Adembidi, utsin yuapenquo Esuquidistu tantiesa icboedi Esuquidistu tantiaquid yanash Nuquin Icbon namiaidquo nendac. ²³ Matses icsaquid icsho cuidnushe quiash abided ciudadec unësquid Esuquidistu Nuquin Papan icmiac aid tantiaquid iquec, Con icbo nec, quiash utsin yuaid iquenda. ²⁴ Adembidi chuinu. Tantiata. Nuquin Papan mibi cuë nuc matses yec Esuquidistu tantiaquid yanash, Èbèd tabadquid con Icbo nec, quec matses yec bédamboec tabadta.

²⁵ Chido inesabèdta dadan inacmaid chuita quequin mimbi dada uaid isun aidotsen chiembi. Aido tantiaquin naden chuita Nuquin Icbon cainquo yaqui Nuquin Icbon èbi chuibeneta caid icquin naden mibitedi chiembique. Tantia. ²⁶ Natiatequid icnuc Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido. ²⁷ Chido inquit yec chido inesa icnu quenda. Adecbidi, chido inesa yec chido inu quenda. ²⁸ Chido inesa icboedi chido inquit yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic cametequid icnuc, ¿Mitsipadentsimbi con chidobèdta con bacuëbo bédambo icmepeba? quec chido inquit tabadec. Chido inesain aden tantienquo yec tabadec. Natiaic cametequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiembi ma natiamianquiec quenquo yec ma mibi tabadnueshun.

²⁹ Ĕmbi chuiboed mibi bēdamboen tantiamembique. Tantia. Nidaidēn yuec tabadnu, quetiapimbo nuqui iquec. Nuquin Papa chieshēnte ushē chonoc abi tantiaquid dadpen mēyansho isash Esuquidistu chote anoentsēqui yaneque. Abi yacno utsibo puduedtiapimbo icnushe queshun min chido icnubi Nuquin Papa bunacpadomboen nabanec tabadta. ³⁰ Adecbidi, unēsquo yec shubiquimbi Nuquin Papa bunacpadomboen nabanec tabadta. Adecbidi, bēdambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquo yec Nuquin Papa bunacpadomboen nabanec tabadta. ³¹ Yuecshun ěmbi nidaidēnshun bedaid Nuquin Papan ěmendac, quequin tantiaquin ambi chiacpadomboen nabanec tabadta.

³² Natiatequid nibēdpashun, queshumbic natiamiantequid iquendac, quequin tantiembi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu queshun aden nabanec tabadpec. ³³ Chido inquidien, Nuquin Papan tantiacpadenuidi nanu quiash, ĵmitsipadentsimbi con chidobēdta con bacuēbo bēdambo iquebi camepeba? quec tabadec. ³⁴ Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bēnēn bēdamboen istsiashi, quec tabadec. ³⁵ Aden mibi chuibanquimbi chido inesa chido bednu quesho, Chēn, caisa nebi. Nuquin Papan chiacpadomboen nabamboedēmbi utsi uain tantianushe queshun ěmbi tantiaid chuibanec nebi. Nuquin Papan tantiacpadomboen bēdamboen tabadmenuequin aden tantiaquin chuibanec nebi.

³⁶ Adembidi, Min champi bednu queboed chudte bunec

mēmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuë tishtiapimbo yantsiash, quiash, Con champi inec cho, quiash icsatiapimbo adquid icoaic. ³⁷ Adecbidi, min champi inu queboedi, Bedenquio iquemi, quesho tantiashun menenda. Aden bedmenquio yec mibi bēdambo icpec. ³⁸ Con champi bedec cho, queshun bedmiash, Bēdambo iquebi, quenubi, Con champi dadan inacmaid iquec quec bēdamboshē utsi icpec.

³⁹ Dadan inaid icquin min bēnē nianenda. Min bēnē unēsān utsin inaid icnu quiash adta. Esuquidistu tantiesān inaid iquenda. ⁴⁰ Bēnua utsin inacmaid icnu quiash bēdamboshē iquec aid. Ēmbi tantiacpaden ěmbi chuiboed Nuquin Papan Mayanēn tantiamicpaden chaid nec.

8

Nuquin Papan uaidbimboecnuc nacnenaid tantiaquin pambid dasanaid

¹ Nēbi Nuquin Papan uaidbimboecnuc nacnenaid tantiaquin pambid dasanaid chuinin naden chiembique. Tantiata. ¿Matsesēn nacnenaidta nuqui tantiaid ictic? Padenquio. Aden tantiaquin ěmbi tantiacpadpenquio icquid utsibo nec quequin mamēnshumpec. Aden tantiaquin mamēnshunquin utsi tantienquio iquec. Ut-sien, Naden nabanquindambi utsibo bēdamboen tabadmepeba, quequin tantiaquidquio nec. ² Ēmbibi tantiēmbi quequid tantiabenabictsēcquid nec. ³ Nuquin Papa tantiaquidien Nuquin Papan tantiaidquio nendac.

⁴ Aden chuishun ¿Nuquin Papan uaidbimboecnuc matsesēn nacnenaid tantiaquin pambid dasanaidtambi pepe?

quequin mimbi chuiquin dada uaboed isun chuinu. Tantiata. Nuquin Papan uaidbimboecnuc matsesën nacnenaïd nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibëdquiec. ⁵ Nïdaïdën samëdquid papa cain utsin cuënaïd dadpen iquec. Adembidi abuc samëdquid Papa cain utsin cuënaïd dadpen iquec. ⁶ Papa cain nuquin cuënaïdien Abia Yampidquio nec. Adquid utsi Nuquin Papa cainquio nuqui iquec. Aidi abitedimbo uabampampidquio nec. Aidquio tantiec nuqui tabadec. Adembidi Nuquin Icbo cain cuënaïdquio Esuquidistu nec. Aidëmbi aton Papabëdtan abitedimbo uabampampid nec. Aidi cuesten dectanac abided cuidadac nuqui cuidtiadquid icnubi Nuquin Papan cuëmbanaïdo yec ambi tantiaïdo nuqui nec.

⁷ Adembidi aid abentsëqui nuqui tantiaïdquio icnubi Nuquin Papan uaidbimboecnuc matsesën nacnenaïd utsibon tantiaïd iquec. Aden nacnenaïd tantiaquin pambid dasanaïd aidon pepec. Aden peboedëmbi Esuquidistu tantiaquid yanshun nacnenaïd tantiaquin pambid dasanaïd ëmbi pesho isun, Icsaosh, Nuquin Papan canushe, qeshun adquid petiapimbo yanebi. ⁸ Nuqui piaïd Nuquin Papa tantiamianesa nec. Ad icnuc Nuquin Papan uaidbimboecnuc matsesën nacnenaïd tantiaquin pambid dasanaïd penquiocsho isash, Aid bëdambocquid nec, quenquio Nuquin Papa iquec. Adecbidi, nacnenaïd tantiaquidën dasanaïd pesho isash, Aid bëdambocquid nec, quenquio icoaic Nuquin Papa.

⁹ Padnuen Nuquin Papan uaidbimboecnuc matsesën nacnenaïd tantiaquin pambid dasanaïd ëmbi bedshun pesho isash, Esuquidistu comapenen tantiaquidën tantiaïd nacnenaïd nec, Esuquidistu tantiabenabictsëcquid quenushe qeshun padenquio iquemi. ¹⁰ Aid pesho isash, Nacnenaïd papa cain cuënaïd nepec, qeshun,

Aid tantiaquin ëmbitsen pambid dasanaid penu, quetsi-ash Esuquidistu tantiabenabictsëcquid. ¹¹ Padnuen ëmbi piaid Nuquin Papa tantiamianesa nec quequin mimbi tantiec. Aden tantiaquin nacnenaid tantiaquin pambid dasanaid mimbi pec. Aden tantiaquin mimbi penubi Esuquidistu tantiabenabictsëcquidën Nuquin Papa tantiamiantequid nacnenaid tantiaquin pambid dasanaid nec, quequin pec. Esuquidistu comapenen tantiaquid mibi icquimbi nacnenaid tantiaquidën dasanaid ëbi icsainquio ictequid nec quequin pequin Esuquidistu tantiabenabict-
sëcquido mimbi icsameyoc. Mimbi icsamiaido tantiec Esuquidistu unëspanëdash. ¹² Ad icnuc Esuquidistu tantiabenabictsëcquid mimbi icsamequin Nuquin Icbon chiacpadomboen niacquid mibi neyoc. ¹³ Padnuen Esuquidistu tantiaquid utsibon icsamboen tantiaquin penushe queshun padpiden penquio iquembi ma icsainquio icpanu queshun.

9

Esuquidistu tantiaquidon natequid

¹ Esuquidistu chuibeneta cacmaid Pabado nec quequidotsen chuinu. Tantia. ¿Matsesën nata caidtabi nedi? Padenquio. Esuquidistun ëbi chuibeneta caid nebi. ¿Adquidida nepeba quecta mibi icpe? ¿Nuquin Icbon chiacpadomboen ëmbi chuibanac mibitedi abi tantiaquido yanenquioda ictionda? ² Ai, ëmbi Esuquidistu chuibanac Esuquidistu tantiaquid mibitedi yanondac. Utsi-utsiec yacnocquid ëmbi chuibanacmaid icnubi, Ëmbi chuibanaido mibitedi nec, quequin tantiembi. Ëmbi chuibanac Esuquidistu tantiaquid mibitedi yanshun, Esuquidistun ëbi chuibeneta caidquio

nebi, quequin Pabadon chiaid abimbo iquec, quequin bëdamboen tantiaquidquio mibi nepec tantesa uainquiocquin.

³ Aden ëmbi Esuquidistu chuibanac abi tantiaquid mibitedi icquimbi utsin-utsinquien ëbi icsamboen chiec. Naden ëbi chieque. Tantia. Pabadon Bednabebëdtan chuibansho pemenquioctiad, quequin chiec. Aden chiec onquequid ëmbibi tantiaquin naden aido chiem-bique. Tantia. ⁴ ¿Esuquidistu chuibanec bundoenquiodabi icpe? ⁵ Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bëdambo iquec, mibi quec. Adembidi utsibon aton chido buanubi Petedon aton chido buansho isash bëdambo iquec quiashic Esuquidistu chuibanec ëbëd capuquimbi Bednaben aton chido buansho isash, Icsambo iquec, quec mibi. ¿Esuquidistu chuibanec ëbëd capuequi aton chido buante bunenquioda Bednabe icpadic? ⁶ Adembidi, ¿Mibi pemembique. Penuequin nabanenda, capenda Esuquidistu chuibenequid utsibo mimbi ique? Bednabebëdta ëbi chiec, ¿Penun daëdshun shubumpi nacentiad, quepecta mibi ique?

⁷ Adyenquio utsibo iqueque. Tantia. Chuinu. ¿Sondado icquinda aton na buanshun pepec? Padenquio. Abi nashunquidombien pemeshun acmec. ¿Icbo abi nashunquid aton tiedën caniquid pemesada nepadic? Padenquio. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid. ⁸ ¿Aden chuiquin ëmbibi tantiaidtambi chuipo? Padenquio. Nuquin Papan Moises dada uamiampid ëmbi chiaid nec. ⁹ Nad iqueque. Tantia. Chuinu: “Min tiedën caniquid ëshë chicnueshun min baca tsuc-tsucmequin dëpuquenda ma penu,” quequin Nuquin Papan chiaidquio nec. ¿Bacanuidi ma penu quequin Nuquin Papan chi-

aidta nepadic? Padenquo. ¹⁰ Matsesbëdtambi ma penu quequin Nuquin Papan chiaidquo nec. Adembidi ambi piaid tantiaquin nabanquido icbo nec. Penuequin tiedën caniquid icbon taneshcaic. Adembidi, penuequin ëshëacsho bedquid icbo nec. ¹¹ Adembidi, ¿Nuquin Papan chiaid mibi paquiacquid yec pete bec cho quenquotiadquidtabi nedi? ¹² Mibi chuibanquid utsibo menebanquimbi ëbia mibi chuiquidquo icsho menetiadquidi menianenquo mibi icpoc. Aden ëbi menenquo yaqui ëmbi chiaid tantienquo icnushe quiash, Bec cho, quetiapimbo iquebi mibi caic. Aden chuibanec bundoquiec capuecuenec nebi. ¹³ Nuquin Papa tabadte shubu uashunaid yacnoshon nashunquidën ashunquo peshun aquec. Adembidi ashunquo nashunquid utsibon matsesën Nuquin Papa menenun bëaid tauishun pambid tëshë bedshun peshun aquec. ¿Aden peshun acpec, quequin tantienquioda mimbi icpe? ¹⁴ Adomboembidi Esuquidistu chuibancho abi tantiaquidon yuedec, quequin Nuquin Papan chiaid nec.

¹⁵ Ëbi yuedtiadquidi nec, quequin tantiequi ¿adabi pemenun yuedpec? quesa nebi. Adembidi, Ëmbi dada uaid buamiacsho isun ëbi yuedtsiash, quequin dada uainquo iccombi. Bunquiec unësbudec mibi caic, Bec cho, quenquo iquendabi. ¹⁶ Ëbibi Esuquidistu chuibenenu quenquioccobi. Ambi ëbi chuibeneta cac Esuquidistu chuibenec nebi. Abi chiesa yanash unësqquo ictsiabi. ¹⁷ Ëmbibi, Esuquidistu chuibenu, quiash, Bec cho, quetsiandabi. Esuquidistun ëbi chuibeneta caid yec ambi namiaidquo nebi. ¹⁸ Esuquidistu chuidenesho isash, ¿atotsi Pabadon bedpash, quepecta mibi ique? Naden Esuquidistu chuibenec nebique. Tantia. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bëdambo iquebi.

¹⁹ Bec cho, quesa yec utsin yuacmaid nebi. Adquid yequi utsibo chuinuec nidanec shubu utsin puduedcuenequin aidon namiaidbimboecquin aidböd tabadquin chuibanec nebi. Adec tabadquin ëmbi chiac ma aidotsen Esuquidistu tantiaquido yampanuna. ²⁰ Adecbidi, isadaidbo Esuquidistu chuibanuec aidoböd tabadquin mimbi natemaid ëmbi natemaidpenquio nec, quenquiocquin ambi natemaid nainquio iquembi. Adquieq tabadquin ëmbi chuibanac ma isadaidbotsen Esuquidistu tantiaquido yampanuna. ²¹ Adecbidi, isadaidpembo chuibanuec aido tabadacpadec abëdi tabadquin Esuquidistun chiacpadec niaquenquio yec tabadec nebi. Ëmbi adoac isadaidpembotsen ma Esuquidistu tantiaquido yampanuna. ²² Adecbidi, Esuquidistu tantiabenabictsëcquido chuibanuec ëmbi tantiabenabi iccondacpaden bëyuc tauain chiaidquio tantiamenuen chuibanec nebi. Ëmbi adoac ma aidotsen Esuquidistu tantiabenquidquio yampanuna. Adequi tabadquin Esuquidistu chuibanec nebi. Ëmbi adoac utsibo ma Esuquidistu tantiaquidquio yampanuna. ²³ Adec tabadequi ma ëmbi Esuquidistu chuibeniac Esuquidistu tantiaquido yanash Nuquin Papa yacno nuquitedi tabadendac.

²⁴ Titinquecuededquido icnuc bëyuc abia titinquec choquid iquendac. Adquid icsho isun, Mibi badedquio titinquioc, quequin titinqueta quequidën titinquec abia choquid menendac. Adembidi, Nuquin Papan menete bëda iquec. Aid bednu, qeshun Icbon chiacpadomben nabanta, caimbi mibi. ²⁵ Badedquio titinquenuequid bedte bunaid chodquetequid icnuc, Aid bednu, qeshun abi bëdiactsëc titincamete pete icsa actequid icsabëdta isuidec titinquenuequid iquec. Nuquien chodquetemaid bednuequin icsaid isuidec. ²⁶ Utsien, Bednu, quenquio

yec titinquec. Adembidi, Bednu, quenquo yec utsibéd mēdanten senanu quequin nibēdacnoshombi mēdanten seded-sededec. Aden tantiaquin naisa nebi. ²⁷ Utsibon ma tantianu qeshun Esuquidistu chuibenias unēsacsho Nuquin Papan menete bēda bedtiapimbo icmane quiash icsaid mēmunc tsadebi.

10

Isadaidbon chieshampicpadec tabadenda quiaid

¹⁻² Abi yacno abi tantiesa chosho puduedmenquo icchitoshe quiash Nuquin Papan chiaid chieshēnenquo yec bēdamboec tabad, quequin tantiamenuen, Naded nuquin tsusedpabo tabadpampic, quequin chiembique. Tantiata. Equipito yacnoshon ambi mēnchicaidobéd Moises puduanec Nuquin Papan bēyucamiaid abu ushu tēdion nidanequin tsusedpabon Acte Piu potepampic. ³ Adec nidaniash yuecash aitedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic. ⁴ Adembidi acte bundoacsho isun cuēnote cuesquin acte chomiaid acash, Ēbi bēdambo icmequin Nuquin Papan ambi yuecshun chometequid Quidistubēdtan nadatiambocquin naid nec, quequin tsusedpabon utsin-utsinquien tantiabempampic. ⁵ Aden tantiabenubien abéd icquid utsibon padenquo icpampic. Aden tantiesa Nuquin Papan nidaid Canan caid menenu caid yacno niduidequi unēsbudnepampic adquidtedi.

⁶ Tsusedpabo chieshampicpadquid icnushe qeshun Nuquin Papan aido chuiquin dada uamepampic. ⁷ Ad icnu tsusedpabon Nuquin Papan uaidbimboecnuc nacenushun papa cain tantiampicpaden tantienda. Naden

Nuquin Papan aido chuipampic. Bacabimboecnuc ambibi nacnenaid tantiaquin peshun acash baidacueded-pampicpaden tantiaquin nainda. ⁸ Adembidi, tsusedpa utsibon ambi chudtemaid chudampicpaden chudenda. Aden nasho abi ushëmbi tsusedpabo dadpen 23,000ted Nuquin Papan cuesunemepampic. ⁹ Adecbidi, ¿Ambi chi-aid niacshodabi Nuquin Papan cuidpeba? quiampicpadec adenda. Aden tantiaquido nisin pebededac unësbud-nepampic. ¹⁰ Adecbidi, Equipito yacnoshon mënchicaido abi mënchicquid chieshec nadpampic. Equipito yacno iquec bëdambo iccondaidi nëmbo choash bunec capuebi. Anobidi tabadec nidebi, queded-quededsho ambi abi yacnoshon uaid mayan bëdabo Nuquin Papan budmiaidën aitedi cuesunepampic.

¹¹ Abi tsibanquido tantiamenuquin tsusedpabo tabadnëdaid icsa Nuquin Papan chuiquin dada uamepampid ëmbi chuiboed nec. ¹² Tsusedpabo Nuquin Papa chieshë nec icsapampicpadec icsamane quequin mibi tabadte tantiata. ¹³ Ënden tsusedpabo chieshëmete icpampid abi iquec. Adaid natiatequid icnuc chieshënushe qeshun Nuquin Papan mibi tantiaquin uidën uac mibi icsainquio yec chieshtoenquio yec dayacquio iquendac.

Nuquin Icbo Esuquidistu unësaid tantiaquin acshumbic mayan icsa tantiaquin mimbi actiapimbo iquec quiaid

¹⁴ Nuquin Papan chiaid niacmane quiash, Nuquin Papan uaidbimboecnuc matsesën nacnenaid tantianu, quenda. Dacuëdec cuenacimboec aid nanacno nidenda. ¹⁵ Tantiabenquid icsho mibi chiec nebi. Pabadon chi-aid abimbo iquec quequin tantiec aid nanacno niden-quo yec Esuquidistu chuibansho tantiec iccuededteneta.

¹⁶ ¿Iccuededquin sicaid acnun Nuquin Papa chiec onqueshun acted-actedquin matses icsaquid icsho cuid-nushe quiash abided ciudadec Esuquidistun intac chididiquiaid tantien icquinda nuqui acti? ¿Adembidi, pete cuësh-cuëshun Nuquin Papa chiec onqueshun aton dada mëyanaid tantien icquinda nuqui pedi? ¹⁷ Esuquidistubëd abentsëc yacbimboecquido nebi, quequin tantiaquin pete cuësh-cuëshun meniac abentsëcshun piacbimboen abi tantiec iccuededquidon pebededec.

¹⁸ Aden nuqui pebededacbimboen isadaidbo icsaid cuidnuen nidaidën capuquidded cunesuniaid pambid tauiquin Nuquin Papan shëdtequid pambid bedshun cunesunequidbëdtan nidaidën capuquid icbon pepanëdash. ¹⁹ Aden ëmbi chiac ¿atotsi Pabado ëbi tantiamete bumpec, quepecta mibi ique? Mibi naden tantiamembique. Tantia. ¿Nuquin Papan uaidbimboecnuc matsesën nacnenaid tibopecta iquec? Padenquio. ²⁰ Adec adquid tiboquesa icnuc mayan icsa tantiaquin Esuquidistu tantiesan Nuquin Papan uaidbimboecnuc matsesën nacnenaid yacnoshon pambid dasanec. Aden aid pambid penu, qeshun mayan icsabëd yacbimboecquid nebi, quequin pec. Adquidbëdtan penda. ²¹ Nuquin Icho Esuquidistu unësaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unësaid tantiaquin pete peshun mayan icsa tantiaquin pambid petiapimbo iquec. ²² ¿Aid tantiaquin acshun pequin Nuquin Papa nëishmenquioda mimbi icti? Ai, abitedi tantiaquidquio icquin abitedi isquidquio icquin Nuquin Papan mibi cuidendac.

Ëmbi natemaid naden nata caid nibëdec, quiash nanueboedi Esuquidistu tantiaquid utsi icsamemane quiash nainquiocte chiaid

²³ Nëid mishtemaid nec. Nëid petemaid nec. Nëid actemaid nec, quequin ëmbi chuitequid nibëdec, quiash Esuquidistu tantiaquid utsi icsamemane quiash nainquio yec tsadebi. Matsesën ambi nacnenaïd tantiaquin pambid dasanaïd ëmbi tantiacmaïd nec, quiash pambid dasanaïd petiadquio iquequi Esuquidistu tantiabenabictsëcquidën, Nëid nacnenaïd nuquin papa caïd nec, quequin penushe quiash penquio yec tsadebi. ²⁴ Utsi tantienquiocquin nacnenaïd pambid dasanaïd piash bëdambo iquebi, quenda. Naden natiad. Matsesën nacnenaïd pambid dasanaïd ëmbi pesho isun utsibon icsamboen tantiatsiash, quequin penda.

²⁵ Aton na sambededacno nidshun pambid bednuequin, ¿Nuquin Papan uaidbimboecnuc matsesën nacnenaïd pambid dasanaïd bedaidta nec? quenquiocquin bedta. ²⁶ Abu nidaidbëdta uashun aidënquio icquidtedi Nuquin Papan uampidquio nec. Aidtedimbo aton na nec. Nacnenaïd yacnoshon pambid sambededaid aton na nec. Aidën bacuëbo iquec aid pambid pequido mibi nec. ²⁷ Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsesën nacnenaïd tantiaquin pambid dasanaïd bedaidta nec, quenda. ²⁸ Adnubien mibi puduedacno isedquid utsi Esuquidistu tantiabenabictsëcquid tsadquin, Matsesën nacnenaïd papa cain cuënaïd tantiaquin dasanaïd nëid pambid nec, cac aid pambid penda. ²⁹ Ëmbi papa cain cuënaïd nec, quequin utsin tantianushe queshun aid pambid penda. Matsesën nacnenaïd con pa nec, quequin cuënaïd tantiesa icquin ¿atotsieshumbimbi matsesën nacnenaïd tantiaquin pambid dasanaïd penquio iqueque? Chuinu. Tanta. ³⁰ Nuquin Papa ëmbi tantiaidquio icnuc penun aidi chuisho isash ¿atotsieshun matsesën nacnenaïd papa cain tantiaquin pepec utsibo quepec? ³¹ Edoen

utsibo tantiamenuen bēdamboen nabanec tabadteneta. ³² Aden naic, Esuquidistu tantiaquid isadaidbo isadaid-pembobēdta Esuquidistu bēdamboen tantiabemequiono, quec bēdamboec tabadta. ³³ Naden naic ēbibi bēdambo iquebi, quenda. Naden ěmbi nabanuc ēbēdi utsi bēdambo ictsiash, quequin tantiata ma Nuquin Papa yacno puduedtequid utsibo yanu qeshun.

11

¹ Ambia tantiaquidēn Esuquidistun icmiacpadquiec tabadec nebi. Adecbidi ěmbi chuiquin ismiacpadquiec tabadteneta mibitedi.

Nuquin Papa tantiaquin iccuededquin naid

² Mimbia tantianēdaidquio mibi nec, quequin mimbi chiaid tantiaquin nabanec nebi, quequin mimbi dada uashun bēmiaid isash bēdambo iquebi. Adembidi, Esuquidistu tantiabenēdaidon chuibanaid mimbi chiacpadomboen tabadec, quequin mimbi dada uaid bēmiaidon chuibancho tantiash bēdambo iquebi.

³ Mimbi natequid utsi chuinu. Tantiata. Abi tantiaquid chuiquid Esuquidistu nec. Adembidi chido chuiquid dada nec. Adembidi Esuquidistu chuiquid aton Papa, Nuquin Papa caid, Edoen nec. ⁴ Adquid Nuquin Papa nec, quequin, Aid chuinu, qeshun aton mauete chicquid dadan. Aid chuinen mauec tabadquin, ěbi chuiquid-penquio Esuquidistu nec, quiacbimboen ismequid nec. Adembidi Nuquin Papan chiaid tantimequin chuibanquidēn aton mauete chiquec. ⁵ Chidoen, ěbi chuiquid Esus nec, quequin ismec mapucudash tsadec. Adec mapucudenquio yec tsadquin Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquio ictiad. ⁶ ěbi chuiquid nibēdec, quiacbimboec tabadsho matasmetiad.

Matasmiash ma mapucudpanu chido. ⁷ Nuquin Papa aton madobëd onquec: Nuquibimboecnuc matses uanuna, quiampicpaden dadaba uapampic. Nuquin Papabimboec icquid nebi, quiash tsadquid dada. Ĕbi chuiquid Abia Yampid nec, quequin ismenuec aid chiec onquec mauete mauesa dada nec. ⁸⁻⁹ Dadaba Nuquin Papan uapampic. Dadabëd icquid uanuna queshun dadan shictodo chicshun chido uashun, Mibëd nashunanquid nec, quequin dada menepampic. ¹⁰ Adquid icmiac dada Ĕbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bëdabo abi chuiquid chieshënenquoio yec Icbon chiacpadquieci tabadec. ¹¹ Nëid chido nec. Nëid utsi dada nec, quenubi nashunanquid abi daëdi nec. ¹² Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi nec. ¹³ ĴNuquin Papa chuinuec Ĕbi chuiquid nibëdeque. Matasadnu quiash chido bëdamboda icpadic? ¹⁴ Chido isadacpadec isadnu quec icsambo dada ictsiash. ¹⁵ Chido isadacpadec dada icsho isash, Chido nec, quetsiash. Dada isadacpadec chido isadenquoio iquec. ¹⁶ Ĕmbi chuiboed tantiash, Icsamboen chiosh, quetsiash. Adquid naden chuinu. Tantia. ĴĔmbentsëquidambi aden chie? Padenquoio. Ĕbipadquiocquin chuibenequidon adomboembidi chuibanec. Adembidi Esuquidistu tantiec iccuededquid utsibon tantiabededec.

Nuquin Icbo unësash uincuenaid tantiaded-tantiadedta quiaid

¹⁷ Adecbidi, Mimbi naidtedi bëdambo iquec, queti-apimbo iquebi. Adquid chuinu. Tantiata. Esuquidistu tantiabenquid utsibo icmenu, quenquoio yec mibi iccuededec. ¹⁸ Abentsëc yacbimboec iccuededesa Esuquidistu

tantiaquido Codinto yacnocquido nec, quiosh. Adsho tantias, Abimbo capec, quiobi. ¹⁹ Nēidtedi ěmbi bědamboen isaido nec. Utsitedi ěmbi icsamboen isaido nec, quiash cuěshědabimboec mibi tabadcuededec. ĴAdec tabadshoda Nuquin Papan mibi bědamboen ispec? Padenquio. ²⁰ Adec tabadquin Esuquidistu uněste tantienquiocquin utsin-utsinquien peshun acted-actedec. ²¹ Utsibo cainenquiocquin abia choquidon nua pebededec. Adoac utsibo choash bunec tabadnubi abia choquido paěmbocquid nua acash tantienquio yec tabadec. ²² ĴMin nuntan pete nibědpecta iquec? Mitsana iquec. Adec mitsana min shubuno icnuc ĴEsuquidistu uněste tantiec utsiboběd iccuedednu, quenquiocquina mibia choshon pebededpe? ĴNatiastianquiec pete nibědchitec pete nibědquid camenuenda mimbia pebedede? Aden pebededquido Ĵatotsimbi chuipe? ĴBědamboen mimbi nabanec quepectabi ique? Padenquio. Aden naquin Esuquidistu uněsaid tantienquiocquin mimbi pec.

²³ Nuquin Icbon chiacpadomboen mibitedi chuibanondambique. Tantiata. Chuinu. Něid inchěshěmbi ěbi chieshěnquido ěběd icquiděn ěbi bedmendac, quequin Esuquidistun abi uněste tantiaquin nadopanědash. Pete bedshun ²⁴ Nuquin Papa chuishun cuěsh-cuěshun naden aběd icquido chuipanědash: “Pete cuěshaid bedash mat-ses icsaquid icsho cuidnushe quiash ěbided cuidadec uněste tantiaquin pebededta,” quepanědash Esuquidistu. ²⁵ Aden chuishumbic aid pebededsho isun pete utsi pebededquin nainshun adembidi děshote bedshun sananquin naden Esuquidistun chuipanědash: “Esuquidistu uněsquin ěbi chian aněděnquiacno něsecatequid icsho měnchictequid Esuquidistu iquec, quequin tantiaquin sicaid acbededta. Sicaid acquin ěbi měnchictequid iquec quequin tantiaquin acban.” ²⁶ Aden Esuquidistun ismeně-

dacpadomboen pete cuëshëmpi pebededshumbic sicaid acbededta. Nuquin Icbo unësaid tantiaded-tantiadedquin aid padpidec choabicnuc adobanta. ²⁷ Abi unëste tantienquiocquin pete cuëshun peshun acquin Esuquidistun chiaid niacquid nec. ²⁸ ¿Pete cuëshëmpi penun Esuquidistubëd tabadacpadquiectabi tabadpe? quequin mibi utsibëd tabadte tantiata. ²⁹ Esuquidistu unësaid tantienquiocquin peshun acquid Nuquin Papan cuidendac. ³⁰ Aden adquidon peshun acac utsi-utsiec padishec; utsi-utiec daicsambo yanec; utsi dadpen ënden unësaid. ³¹ ¿Adabi Nuquin Papan chiaid niaquenquo yec tsadpe? quequin tantiec tsad. Aden tantiec tsadshumbic, Icsaobi, Papa, qeshun mibi icsaid chuiban. Aden chuishun Esuquidistu unësaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic camenquo iquendac. ³² Adesa icsho Nuquin Papan natiaic camiaid mibi iquendac. Abi tantiesabëdta chian anëdënquequid nësecadenquo mibi icmenuen Nuquin Papan mibi natiaic camec ma ëmbi chiacpadomboen nabamenuequin. ³³ Adembidi Esuquidistu unësaid tantianuec iccuededquin utsibo choabi iquec quequin aido cainta. ³⁴ Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unësaid tantianuequin naden nata quequin chiombi. Mibi yacno nidash puduedshun ëmbi chuiboed daëd uain chiendambi.

12

Nuquin Papan Mayanën tantiamiaid

¹ Nuquin Papan Mayanën tantiametequid chuinu. Tantiata. ² Ënden mibitedi Esuquidistu tantiesa yec Nuquin Papan uaidbimboecnuc ambi nacnenaid matsesën ismec,

Nëid papa cain cuënaid nec, qesho tantiaquido mibitedi iccondac. ³ Adquid iccondaidi Esuquidistu tantiaquid mibi yanacsho naden chiembique. Tantia. Nuquin Papan Mayanën tantiamiaido: Esus Nuquin Icbopenquo, Nuquin Papan Chomicmaid nec, quetiapimbo adquido iquec. Adecbidi, Nuquin Papan Mayanën tantiamiacmaido: Esuquidistu con Icbo nec, quetiapimbo icoaic.

⁴ Nuquin Papan Mayanën, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsëcquiobi tantiamianquid Nuquin Papan Mayan nec. ⁵ Adecbidi, utsi nashunquido Esuquidistu tantiaquido icnubi utsi nashunquidon Icbo abentsëcquiobi Esuquidistu nec. ⁶ Adecbidi, nadatiambocquin nabanquid utsi-utsiec icnubi Nadatiambocquin namianequid abentsëcquiobi Nuquin Papa iquec.

⁷ Esuquidistu tantiaquid utsibëd tantiananquin namenu, quequin aton Mayan Nuquin Papan nuqui menec. ⁸ Nuquin Papan Mayanën tantiamiac ambia comapenen tantiaquidquo icquin chuibanquid utsi-utsiec iquec. Nuquin Papan Mayanën tantiamiac ambi tantiaid chuibanquid utsi-utsiec iquec. ⁹ Nuquin Papan Mayanën tantiamiacpaden ëmbi chiacpadomben Nuquin Papan naic, quequin tantiaquid utsi-utsiec iquec. Nuquin Papan Mayanën tantiamiac bëdamequid utsi-utsiec iquec. ¹⁰ Nuquin Papan Mayanën tantiamiac nadatiambocquin nabanquid utsi-utsiec iquec. Nuquin Papan Mayanën tantiamiac Nuquin Papan nanun chuipampid tantiaquin chuibanquid utsi-utsiec iquec. Nuquin Papan Mayanën tantiamiac matses bëdamboec tabadsho isash, Nuquin Papan Mayanën tantiamiaid nec, quequin tantiaquidquo utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanën tantiamiac

nidaidën icquid onquiacmaidën onquequid utsi-utsiec iquec. Adembidi Nuquin Papan Mayanën tantiamiac nidaidën icquid onquiacmaidën onquesho tantiaquidën tantienquiocsho isun aidon onqueten chuibanquid utsi-utsiec iquec. ¹¹ Aden Nuquin Papan Mayanën tantiamiac nabanquido nuquitedi nec. Ambi tantiacpaden abentse-abentsen Nuquin Papan Mayanën aden tantiamec.

Dada abentsëc yacpadquiec Esuquidistu tantiaquidtedi iquec

¹² Uidënaid dadpen icnubi matsesën dada abentsëc iquec. Adquiobidi Esuquidistu tantiaquid dadpen icnubi ambi tantiaid abentsëcquiobi Esuquidistu iquec. ¹³ Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan meniaido nuqui nec.

¹⁴ Matsesën dada abentsëqui icnubi uidënaid dadpen iquec. ¹⁵ ¿Mëdantepadquidpenquio yec matsesën dada uidënacmaidta taë icpec? Padenquio. Dada uidënaid taë iquec. ¹⁶ Adecbidi, ¿ëshëpadquidpenquio yec matsesën dada dëccuësquiacmaidta dëbiate icpec? Padenquio. Dëbiate dëccuësquequid iquec. ¹⁷ Matsesën dada ëshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash? ¹⁸ Nuquin Papan tantiampicpadquiequi matsesën dada uidënaid nec. ¹⁹ Dëccuësquequid abentsëc icnuc dada nec quetiapimbo iquec. ²⁰ Uidënaid dadpembëd dëccuësquequid dadpen icnuc matsesën nami abentsëqui iquec.

²¹ Matsesën dada ad icnuc, ¿Mëdante bëdambo icnubi ëshë padenquio iquec, quepecta mibi ique? Padenquio. ²² ¿Isadesa uidënaid uquëducquid nibëdnuc matsesën dada bëdamboda icpatsiash? ²³ Uidënaid uquëducquid

ismenquiocquin ompoaidquio utsi nec. ²⁴ Nami isaidquio ompodesa nec. Nuquin Papan tantiampicpadquiequi ompoaid nibëdnuc matses cuëdenquio yec unësec. ²⁵ Ad icnuc, Icsambo icmianeque. Tësnu, quetiapimbo icbo iquec. Ompoaid ompodesa aïdbëdi iquec bëdambo yec nashunanquid aïdtedi nec. ²⁶ Abentsëc paëmbo iquec matsesën dada bëdambo iquenquio iquec. Adquidtedi bëdambo iquec matsesën dada abichobi paëpenquio iquec. Adecbidi, Esuquidistu tantiaquido abentsëc yac bimboec iquec abentsëc icsacsho isash abitedi unësquio iquec. Abentsëc, Bëdambo iquebi, quenuc aïdbëd abitedi bëdambo iquec.

²⁷ Adquidtedi matsesën dada abentsëc yacpadquieci Esuquidistu tantiaquidtedi aïdën dada abentsëc yac bimboecquid nuqui nec. Abi tabadtequid iquec. ²⁸ Abi tabadtequid nadquid iqueque. Chuinu. Tantia. Ambi chiacpaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid icsho isun nadec tabad quequin chuibanquin ismequid utsi iquec. Nadatiambocquin nabanquid utsi iquec. Bëdamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiacmaidën onquequid utsi iquec. Adquidtedi nuqui iquec abentsëc yac bimboec nuqui tabadec. ²⁹ ¿Esuquidistu tantiaquidtedida ambi ëbi chuibeneta caid icpadic? Padenquio. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquio. ¿Esuquidistu tantiaquidtedida, Nadec tabad, quequin ismequid icpadic? Padenquio. ³⁰ Adecbidi, ¿Esuquidistu tantiaquidtedida bëdamequid icpadic? Padenquio. ¿Esuquidistu tantiaquidtedida abi onquiacmaidën onquequid icpadic? Padenquio. ¿Utsi onquiacmaidën

onquesho tantiaquidën tantienquiocsho isun aidon onqueten onquequin chuibanquidtedida icpadic? Padenquio. ³¹ Nuquin Papan Mayanën tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenuequin ëmbi abia chuibambocpadquid icte bunquiota.

Utsi tantiaquidquio

Ëmbi chuiboedtedi Esuquidistu tantiaquido Nuquin Papan Mayanën tantiamete bëdambo iquec. Padnuen ambi tantiamequin bëdamboshë icmetequid iqueque. Aid tantiauidquidba chuiboshombic aid tantiaquidquio chuinu. Tantiata.

13

¹ Matses utsi-utsiecquid onquiapadquiec anquiadquid, adecbidi Nuquin Papan abi yacnoshon uaid, mayan bëda onquiapadquiec onquequid icquimbi utsi tantiesa icquin chuibansho abipenquio chuisho utsibon tantiendac. ² Utsibic, Nuquin Papan Mayanën tantiamiac chuibanquid adembidi Nuquin Papan chienquio icampid Nuquin Papan Mayanën tantiamiac tantiaquid aidi niosh. Aidëmbidi Nuquin Papa nadatiambocquin naquidquio nec, quequin tantiaquin, Mananuc macuësh dapa icboedi acte nantan nënitsinoa, Papa, cacpadomboen nënitsinoac nidquid isquid icquimbi utsi tantiesa icsho, Bëdamboquid mibi nec, Nuquin Papan catiapimbo iquec. ³ Utsibic, aton na nibëdsho menequidquio niosh. Adembidi, Esuquidistu tantiesa nebi cata, cac padenquiocsho mëyanaid niosh. Adquid icquimbi utsi tantiesa icsho, Bëdamboen mimbi naoc, Nuquin Papan catiapimbo iquec. ⁴ Padnuen Nuquin Papan Mayanën bëdamboshë ictequid tantiamiaid nadquio iqueque. Chuinu. Tantia. Utsi tantiaquidquio utsi

tantiamequionuec chushcanesa nec. Utsi tantiaquidquio nashundenequid nec. Utsi tantiaquidquio utsin na isash adquidquio con na bēpashun quesa nec. Utsi tantiaquidquio dēniacanquidquio yec dēniacanquidquio nebi abibi quesa nec. Utsi tantiaquidquio ēbentsēqui tantiaquidquio nebi quiacimboen nabanesa nec. ⁵ Utsi tantiaquidquio utsi icsamboen tantiaquin nabanesa nec. Utsi tantiaquidquio, Ĕmbentsēqui tantiacpadomboenuidi utsitedishun nabantiad, quesa nec. Utsi tantiaquidquio badedquio nēishesa nec. Utsi tantiaquidquio abi icsamboen nasho cuidesa nec. ⁶ Utsi tantiaquidquio utsi icsambocsho isash, Unēsquio iquebi, quec tsadquid nec. Adecbidi, utsi bēdamboesho isash, Bēdambo iquebi quec tsadquid neoaic. ⁷ Utsi tantiaquidquio utsi icsaid chienquio yec tabadquid nec. Utsi tantiaquidquio ambi nanaid nibēdsho isash ampiash badedquio quenquio yec ĵmitsimboembi nampoba? quec onquequid nec. Utsi tantiaquidēnquio utsi icsadenesho isun, Tantiamic Nuquin Papan chiacpadomboen natsiash, quequin chuibanendac. Aden chuishun bēdamboen nasho isnuen cainquid nec. Mēyanaqui chieshenquio yec dayacquio yec tabadtenequid utsi tantiaquidquio nec.

⁸ Utsi bēdamboen tantiaid ēnēdtiapimboctequid nec. Nuquin Papan chiaid chuibantsaidien ēnēdendac. Adecbidi, matses onquiaidtedi ēnēdendac. Adecbidi Nuquin Papan ambi uaidtedi ēmiac matsesēn isquin tantiaid ēnēdoaic. ⁹ Nabanaidtedi tantiabenabictsēcquidquio nuqui nec. Adecbidi Nuquin Papan chiampidtedi tantiabenabictsēcquidquio nuqui neoaic. ¹⁰ Nidaidēn tabadquin aidtedi tantiabenabictsēcquidquio nuqui icboedi Nuquin Papa yacno puduedash abitedi tantiaquidquio nuqui iquendac. ¹¹ Bacuē yec bacuēmpi onquiacpadec

onquepadenebi. Adembidi, bacuëmpin tantiabenabi yacpaden tantiapadenembi. Adquid icquin caniaidën tantiacpadpenquiocquin tantiapadenembi. Adquid icboedi caniaash bacuëmpin tantiacpadpenquiocquin tantiabenondambi. ¹² Nëbi isnanten bëisadquin Nuquin Papabimboecquid nuqui isec. Yuecshun abi yacno puduedshun aidquiobi Edoen Nuquin Papa nuqui bëistuidendac. Nëbi Nuquin Papa isenquiocquimbi ambi chiaid tantiatsembi. Ambi tantiacpaden yuecshun bëisquin nuqui tantiabenendac aid.

¹³ Nidaid ënëdnuc nëidtedi ënëdtemaid iqueque. Chuinu. Tantia. Ambi chiacpaden nabanquidquio Nuquin Papa nec, quequin tantiaid ënëdtemaid nec. Adecbidi Nuquin Papa yacnoësh abipadquid bëdambocquidquio iquendabi, quequin cainquin tantiaid ënëdtemaidquio nendac. Adecbidi, utsi tantiaid ënëdtemaidquio neoaindac. Aidtedi ënëdtemaid icnuc nidaidën tabadquin, Utsi tantiembi, quequin ismiac utsi dadpen Esuquidistu tantiaquid yanash mibëdi Nuquin Papa yacno tabadendac. Adquid bëdamboshëcquid nec.

14

Mimbi chiaid chuibanquid ëbi icme, Papa, quaid

¹ Utsi tantiaquid icta. Nuquin Papan Mayanën adquid icmiosi, quequin ambi tantiamete utsi bunquiebique. Adec bunsho mimbi chiaid comapenen bëdamboen chuibanquid ëbi icme, Papa, quequin chuiban. ² Aden tantiamiac tantiamenu queshun tantianuequidën onqueten chuiban. Aton onqueten onquenquiocsho aidon tantienquio iquec. Padnuen onquiaidtedimbo Nuquin Papan tantieque. Aden nidaidën icquid onquiacmaidënquio Nuquin Papan Mayanën tantiamiacpadec onquequin Nuquin Papa chiec onqueta. ³ Ma

Esuquidistu utsibon tantiabenu, qeshun Nuquin Papan chiaid chuibanec. Adembidi matses ma bēdamboec tabadnu qeshun chuibanec. ⁴ Nuquin Papan Mayanēn tantiamiac nidaidēn icquid onquiacmaidēn onquequin onquequiduidtsēqui tantiabenquid yanec. Padnuen Nuquin Papan chiaid Nuquin Papan Mayanēn tantiamiac Esuquidistu tantiaquido ma Nuquin Papan chiaid tantiabenu qeshun chuibanec. ⁵ Nuquin Papan Mayanēn tantiamiac nidaidēn icquid onquiacmaidēn Esuquidistu tantiaquidtedi onquepashun. Aden chuishumbic adec onquenquiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenendac. Padnuen nidaidēn icquid onquiacmaidēn chuibanac tantianuequidēn tantienquio iquendac. Aden tantienquiocsho isun abi daēdi onquiaid tantiaquin chuibanquid nibēdnuc nidaidēn icquid onquiacmaidēn chuibanenda caimbi.

⁶ Adembidi chuinu. Utsibon tantia. ¿Mibi yacno choash puduedshun nidaidēn icquid onquiacpadece onquenquiocquin ěmbi chuibansho tantienquio yec, Bēdambo iquebi, quecta mibi tabadpe? Padenquio. Nuquin Papan chiaid dada uamiampid min onqueten ěmbi chuibansho mimbi tantiabampec. Min onqueten chuibanenquio yec ěbibi onquiacbimboecsho mimbi tantienquio ictsiandac. ⁷ Shoncatempi abibi shoncadiapimbo iquec. Adembidi, aid shoncaisan shoncasho tantiatiapimbo utsin iquec. Adembidi aid cuēdēmesan tentencate cuēdēmesho tantiash, Adomboen cuēdēmenquio iccosh, quec. ⁸ Adembidi, utsibo yacno ma cuesnanu qeshun chomenuequin sondadon tantiabocpadpenquiocnoc shoncac choenquio iquec. ⁹ Adecbidi, utsi onquiacmaidēn onquequin chuisho ¿mitsipaden tantiapatsiash? Utsibon tantienquio iquec. Aden chuibanec nibēdacno onquiacbimboec onquepec.

¹⁰ Onquete utsi-utsiec dadpen iquec. Aton onqueten onquequin chuibansho matsesën tantiec. ¹¹ Utsin onqueten chiac tantiatiapimbo yec, Onquequin chuibanquid con matsespenquio nec, quequin tantiec. ¹² Ad icnuc, Nuquin Papan Mayanën ëbi tantiamepec, qeshun, Esuquidistu tantiaquido ma tantiabenquido yampanu qeshun mimbi chiaid chuibanquidquio ëbi icme, Papa, quequin Nuquin Papa chuita.

¹³ Nidaidën icquid onquiacmaidën onquequid nebi, quequin tantiec. Adec onquequin chuibanquin iccuededquidon onquetenquio ëmbi chuiboed chuioaquid icme, Papa, ma tantiapanu, quequin Nuquin Papa chuita. ¹⁴ Nuquin Papa chiec ëbi onquiacmaidën onquesho utsibon tantienquio iquendac. ¹⁵ Aden abi onquiacmaidën onquequin utsibon tantienquio icsho ¿mitsipadentsimbi tantiamepe? Naden naimbi. Iccuededquido onquiacmaidën onquequin Nuquin Papa chuishumbic tantiamenun iccuededquidon onqueten onquequin chuibanonuna. Adecbidi, iccuededquid onquiacmaidën Nuquin Papan naid chiec cuëdënnashic tantiamenuc iccuededquidon onqueten cuëdënoanuna. Adembidi abi onquiacmaidën onquequin chuibanshun iccuededquidon onqueten chuibanotiapimbo icquin abi onquiacmaidën onquequin chuibanenquio iquembi. Adecbidi abi onquiacmaidën cuëdënenquio iquebi. ¹⁶ Iccuededquido onquiacmaidën onquequin Nuquin Papa chuibanuc ¿mitsipadec, Ai, abimbo iquec, quepec aido? Aton onqueten onquequin Nuquin Papa chuibansho tantiash, Mibi bëdambo iquec, Papa, quequin chiendac. ¹⁷ Abi onquiacmaidën onquequin Nuquin Papan naboed chuibanac Esuquidistu tantiadonequidquio mibëd iccuededquido yantiapimbo iquec.

¹⁸ Èbibi utsin-utsinquec onqueten onquequidquio

icnubi mibitedi adesa nec. Padnueni adec onquec bēdambo iquec, Papa, quequin chuided-chuidedembi.
¹⁹ Padnuen chuinuec Esuquidistu tantiaquido iccuededacno puduedash ma tantianu quiash aton onquete daēdpactsēc tantiash anquiadquid icquin aitedictsēqui chiendambi aido onquiacmaidēn onquenquiocquimbi.

²⁰ Adembidi chuinu. Utsibon tantia. Bacuēbo tantiabenshuncquid yacpadquiec icsaid tantiesa icta. Ēnden caniaidēn tantiabenshun ismiacpaden bēdamboec tabadquin ismeta. ²¹ Nuquin Papan chiampid nad iqueque. Tantia: “Ēmbi chuiban cac aton matsesēn chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidēn onquequin chiac tantiesa icquin ėmbi chiacpadomboen nate bunenquio icoaposh,” quequin Nuquin Papan dada uamiampid nec.

²² Adoaidi Nuquin Papan Mayanēn tantiamiac abi onquiacmaidēn onquequin chuibanquin Nuquin Papan chiaid tantiabenshuncquid Esuquidistu tantiaquid icmetiapimbo iquec. Padnuen adec onquequin chuibansho tantiash, Nuquin Papan naid nec, quequin Esuquidistu tantiesa icboedi abi tantiaquid yantsiash. ²³ Padnuen Esuquidistu tantiaquido iccuededacno Esuquidistu tantiesa puduedshun abi onquiacmaidēn abitedi onquecuededsho tantiash, Aidon tantiate icsabudpash, quepec. ²⁴ Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsēcshun-abentsēcshunquien Nuquin Papan chiaid chuibansho tantiash, Icsaobi. ²⁵ Nēbi ėbi bēdambo icmequid Esuquidistu tantiate bunebi, qeshun abi icsaid ambi chienquiocboed Nuquin Papa chiashic, Nēmbo iccuededquidobēd mibi iquec, Papa, quequin

chuibampec Esuquidistu tantiaquid yanshun.

Abentsēcshun-abentsēcshunquien chuiban, quequin chiaid

²⁶ Adembidi chuinu. Adembi tantiata. Esuquidistu tantiaquid iccuededec cuëdënu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidënu onquequin chuinu, utsi quenubien; mibi onquiacmaidën chuisho tantiombique. Min onqueten chuinu, utsi quetsiash. ²⁷ Aided, Chuinu, qesho ¿mitsicquid chuita nuqui cape? qeshun naden chiac bëdambo ictsiash. Chuinu. Tantia. Mibi onquiacmaidën onquequin chuinuequid daëd icnuc bëdambo ictsiash. Abentsēc chotsēc nuc adecbidi bëdambo ictsiash. Aided icquin abentsēcshun-abentsēcshunquien onquequin chuiban, cata. Aden abentsēcshun onquequin chuisho abi onquiaid tantiaquidën iccuededquidon onqueten chuibanta, cata. ²⁸ Padnuen abi onquiaid tantiaquin chuibanuequid nibëdnuc, Tsadquin Nuquin Papauidi otacquiocquin chuita, cata.

²⁹ Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daëd icnuc bëdambo ictsiash. Abentsēc chotsēc nuc adecbidi bëdambo ictsiash. Aided icquin abentsēcshun chuibanubi, ¿Nuquin Papan Mayanën tantiamiac padomboenda chuibanegue? Isnu, quequin chuibanuequid utsibon Nuquin Papan chiaid isban. Adembidi, utsin chuibanubi adomboembidi isbanoaic utsibon. ³⁰ Abentsēcshun chuibanubi Nuquin Papan Mayanën tantiamiac utsi: Ëmbitsen chuibanu, qesho tantiashun ma aidën chuibanu quiash ambia chuibanquid ënëd. ³¹ Adquidën iccuededquidtedi tantiamenuquin abentsēcshun-abentsēcshunquien chuibanta. Aden

chuibansho tantiash ma chieshenquo yec bēdambo icpanu. ³² Nuquin Papan Mayanēn tantiamiaid utsibēd bēdamboec tabadquid nec. ³³ Nuquin Papan tantiamiacpadequi utsi onquenubi onquenquo utsibo tabadec. Onquenu, utsi quenuc, Ai, onqueta, qeshun onquenquiocquin cainec tabadec chuibanuequid utsibo. Esuquidistu tantiec iccuededquido utsi-utsiec yacnocquido adecbidi tabadquido nec.

³⁴ Esuquidistu tantiaquido iccuededacno otacquo tabadquid chido. Chuibanacnoēsh onquenu, quenda chido. Nuquin Papan chiacpadec ēbi chuiquid dada nec, quec chido. ³⁵ Anoshon chiaid tantienquo yec tsadquin cainec shubuno nidash, Tantienquo iccombique. Nuqui tantiaboed ēbi chui, qesho tantiashun chiec aton bēnēn. Tantienquiocquin cainenquo iquec chido icsambo iquec. ³⁶ ¿Mimbia Nuquin Papan chiaid chuibanquidoda ne? Padenquo. ¿Chuibanac Esuquidistu tantiaquido mibitedictsēquida yanondac? Padenquo. ³⁷ Nuquin Papan chiaid chuibanquidquo nebi, mibi quenuc, Nuquin Papan tantiamiacpaden Pabadon chuibanquin dada uaid nec, mibitedi quepec. ³⁸ Aden mimbi tantianubi, Pabadon dada uaosh, quenquo utsibo icpec. Aido Nuquin Papan tantiamiacmaido iquec. Adquid icsho isun, Pabadon dada uaid nec, quequin tantiamenu, quenda.

³⁹ Adembidi chuinu. Adembi tantiata. Nuquin Papan chuipampid comapenen tantiaquin chuibante bunquiota. Aden chuibanquid mibi icnuc utsi onquiacmaidēn onquequin chuinesho, Ai, cata. ⁴⁰ Adecbidi, Nuquin Papan Mayanēn tantiamiac chuibanuequid dadpen icnuc utsibo bēdamboen tantiamenuequin abentsēcshun-abentsēcshunquien chuibanta.

15

Esuquidistu uincuenaid

¹ Adembidi chiembique. Tantia. Matses icsaquid icscho cuidnushe quiash abided ciudadec Esuquidistu unësaid ëmbi chuibansho tantiash, Ai, abimbo iquec. Aid tantiemi, mibi quiampondac. Aden tantiadonec chieshenquoio yec mibitedi tabadec. ² Aden, Aid tantiabenu, qesho Nuquin Papan mibitedi bëdambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bëdambo icmebanacmaid nec. Adecbidi, ambi yuednu cacmaidquoio adquid nec.

³ Utsin ëbi tantiamiacpaden mibi chuibanondambi. Adembidi chuinu. Tantia. Nuquin Papan chiacpadomboen matses icsaquid icscho cuidnushe quiash abided ciudadec Esuquidistu unëspanëdash. ⁴ Unëzacsho shëcuë nacnenaidën nauedshun bëtashacsho daëdec ushtanquin ambi chiampicpaden Nuquin Papan uincuen uapanëdash. ⁵ Aden uincuemiach choquin, Uincuenobi, quequin Petedo Esuquidistun ismepanëdash. Adshumbic adembidi abëd 12ted icquido ismeoapanëdash. ⁶ Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanëdash. Aid uincuenacsho isquido dadpen abi tabadnubi utsi-utsiec padenquoio iquec. ⁷ Aden aitedi ismeshumbic aton utsi Santiacotsen Esuquidistun ismeoapanëdash. Adshumbic, ambi ëbi chuibeneta caitedi ismeoapanëdash. ⁸ Aden aido ismequin nainshun yuecshun ëbitsen ismeoapondashi. Icsactsëcquiocquid nec, quenquiocquin ismebenondashi tsyuecquoio. ⁹ Abi tantiaquid mëyanquin cuesunemequidquoio icboedi abi tantiaquid yanacsho Esuquidistun, Ëbi chuibeneta, cainquioctiadquidëmbi

adquid icta caid nebi. ¹⁰ Esuquidistu tantiaquid yansho isun ëbi chieshaid cuidenquo yac Nuquin Papa bunacpadomboen Esuquidistu chuibenequid nebi. Adquid Nuquin Papan icmioshi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenenquiocnobi. ¿Ëmbentsëquidambi chuibenedio? Aton Mayan Nuquin Papan meniac aibdëd icquin chuibeniombi. ¹¹ Adembidi, ëbi yacpadquidon Esuquidistu chuibanac utsitsen abi tantiaquido yampondash.

Matses unësash uincuenaid

¹² Adec Esuquidistu unësash uincuenondash, quequin chuinubi ¿mitsipaden tantiec uincuenta nibëdec quec utsi-utsiec onquepec? ¹³ Uincuenta nibëdnuc Esuquidistu uincuenenquo ictsempañëdash. ¹⁴ Esuquidistu uincuentequid icmiamboconoc abi chuibanquid muambo ictsiandac. Esuquidistu tantiaquid nebi, quiaidbidi muambo ictsiandac. ¹⁵ Nuquin Papan naid chuibanquidtedi muaquidquo icoatsiandac. Aden tantienquiocquin ëbi yacpadquidon chuibanendac. Unësash uincuentequid nibëdnuc ëbitedishun Nuquin Papan Esuquidistu uincuen uapanëdash quequin chiaid abipenquo ictsiandac. Unësash uincuenta nibëdnuc Nuquin Papan uincuemi-aid nibëdtsiandac. ¹⁶ Unësash uincuenta nibëdnuc Esuquidistu uincuentiapimbo ictsempañëdash. ¹⁷ Aid uincuenambo icnuc matses icsaquid icsho cuidnushe quiash abided cuidadquid Esuquidistu nec, cainquo mimbi ictsiandac. Matses icsaquid icsho cuidnushe quiash cuidadquid nibëdtsiandac. ¹⁸ Aid uincuenamboconoc abia tantiaquido tsusedpabo Nuquin Papa yacno puduedti-apimbo ictsempañëdash. ¹⁹ Nidaidënuidi Esuquidistu

tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquio ictsiandac.

²⁰ Ĕmbi chuiboedtedi adtiapimbo iquec. Esuquidistu Nuquin Papan uincuen uapanēdash, quequin chiaid abimbo iquendac caimbi. Nuquin Papan ambi abia uincuemiaid abi yacno puduedmequin ambi uincumetequid dadpen iquendac, quequin chiaid abimbo iquec. ²¹ Unēstequid bëyuc dada yanampicpadec matsestedi adecbidi iquec. Adecbidi, unēsash uincuentequid Esuquidistu yanacpadec abi tantiaquidtedi adquiobidi iquendac. ²² Bëyuc dada Adan caidēn tsyuecquidtedi adecbidi unēstequido nec. Esuquidistun bēdambo icmiaid uincuentequido neoaic. ²³ Esuquidistubimboecquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac. ²⁴ Aden bedoanquin abi tantiaquidtedi bëyucanec choquin Nuquin Papa Edoen caid ismequin, Nēidtedi min shubu abentsëquën tabadquido nec, quequin chiendac abi chieshënquidtedi chën quetiapimbocnoc. Aido ambi nebudacimboecquido iquendac. ²⁵ Abi chieshënquido utsitedibēd chuiquid icquin abi chieshëntiapimbocquid aido Esuquidistun icmebanendac. ²⁶ Adoshombic ënquimbi unēstequid nibēdquidquio Esuquidistun icmeoaindac. ²⁷ Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquio aton Papa iquec. ²⁸ Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsëcquiobi nendac.

²⁹ Unēsash uincuentequid nibēdnuc, ;atotsieshun, Ĕn-

den unësaid uincuenendac, quequin tantiembi quequin utsibon acten ambibi mentomepec? ³⁰ Adecbidi unësash uincuentequid nibëdnuc ëbi unës uate utsibo comapenec buncuededsho isun ¿atotsieshun, Uincuentequid iquec, quequin ëbi yacpadquidon chuibampec? ³¹ Unësash uincuentequid iquec, quequin tantiembi. Aden tantiaquin Esuquidistu, Nuquin Icho, ëmbi chuibanac Esuquidistu tantiaquido mibitedi yampondac, quequin tantiembi. Aden tantiaquin unësmane quenquiocquin Esuquidistu unësash uincuenta iquec, quequin chuibenec nebi. Aden badiadquidën-badiadquidënquien chuibanubi ëbi unës uate utsibo bunec. ³² Uincuentequid nibëdnuc, ¿atotsi quenequini Epeso yacnoshon, Uincuenta iquec, quequin chuibansho mëyanaqui chieshenquio yec dayacquio tsadpe? quetsiabi. Adecbidi uincuenta nibëdnuc: “Unësash nibëdquiec iquebi, quequin nua peshun aque-mbi,” quetsiabi. ³³ Aden tantienquio iquembi. Adembidi tantienda. “Uincuenta nibëdec quequidbëd capuenda aidën tantiacpadec icmane quiash.” ³⁴ Adquidpadquid icquin mimbi icsamboen tantiaid ënquin Nuquin Papan chiaidquio tantiata. Esuquidistu tantiec mibëd iccuededquid utsi-utsiec, Nuquin Papa nadatiambocquin uincuemianquidquio nec, quequin tantiesa nec. ¿Adquid mibëdi icnuc Nuquin Papan bëdambo icmiaido mibitedida icpe? Padenquio.

Uincuemequin dada chuca meniaid

³⁵ ¿Mitsipadec unësaid uincuempec? utsi quepec. Adecbidi, ¿mitsipadquid uincuentequidën dada icpec? utsi queoapec. ³⁶ Adquidën icsamboen tantieque. Chuinu. Tantia. Mimbi tiedën chococaid tauibëd ëshë chococatequid napi dëyuctequidpadpenquio iquec. ³⁷ Mimbi tiedën chococaid utsi-utsiec iquec. Adecbidi mimbi tiedën siaid utsi-utsiec iquec. Mimbi chococaid mimbi

siaidbidi dëyuctequid utsi-utsiec iquec. ³⁸ Nuquin Papan tantiampicpadec aton dada yanec. ³⁹ Abipadquidpenquio ambi uaidtedi iquec. Abipadquidquio matsestedi iquec. Abipadquidquio nidaidën capuquidtedi iquec. Abipadquidquio podochoquidtedi icoaic. Abipadquidquio acten icquidtedi icoaic. ⁴⁰ Abuc tabëcaid icnubi nidaidën icquid iquec. Abuc tabëcaid abipadquid chënquesho isec nidaidën icquid tabadec. ⁴¹ Badiadën ushë comapenquiec chënquenubi inchëshën ushë dauebudquio chënquéc. Aid daëdi nua isadnubi uispa pistsëc isadoaic. Uispa utsi-utsiec iquec. Abi bedquéc chënquetequid utsi-utsiecbidi iquec.

⁴² Aidtedi ënëndendac. Adecbidi tishac matses unësacsho chococac nami chodquéc. Adec nami chodquian Nuquin Papan tantiacpadec uincuentequidën dada chuca chodquesa nendac. ⁴³ Tishac icsaquid matses iquec. Adsho uincuemequin ambi icsaisa icmiaid nendac. Nidaidënshun tishac chonoadec uimabudquid matses nec. Yuecash unësacsho uincuemiác uimabudenquiocquin nabanendac. ⁴⁴ Nidaidënshun tishac daicsambo yanash unësacsho uincuemequin dada chuca icmetequid nendac. Nidaidënshun tishac matsesën tantiacpadquid icboedi Nuquin Papan uincuemiác aidën tantiacpadquid iquendac.

Nidaidënshun tishac matsesën tantiacpadquid icboedi abuc buanac anocquidën tantiacpadquid iquendac. ⁴⁵ Adembidi Nuquin Papan chuiquin dada uamiampid nad iquec: “Bëyuc matses Adan caid nacnenshun Nuquin Papan bushcac taëc tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. ⁴⁶ Nuquin Papan matsesën tantiacpadquidba icmiác Esuquidistu tantiaquid icsho isun abipadquid meniac

icbon tantiacpadquid yanec. ⁴⁷ Bëyuc matses uanu, qeshun nidaid putu bedshun nacnenaid nepampic. Bëyuc matses Adan caidën tsyuecquid Nuquin Papan abi yacnoshon budmiaid nepanëdash. ⁴⁸ Nidaid putu bedshun bëyuc matses nacneshun nidaidën tabadquid icmepampic. Adquiecbidi abipadquid matsestedi yanac. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aido iquendac. ⁴⁹ Adecbidi bëyuc matses isadac bimboecquid nidaidën tabadquidtedi nec. Nuquin Papan abucshun chomiaid isadac bimboecquid abëd icquido iquendac.

⁵⁰ Adembidi chuinu. Tantiata. Matsesën dada nami intacchoquid chodquetequid icnuc Nuquin Papan shubu abentsëquën tabadiapimbo adquid iquec. Chodquetequid chodquetemaid ictiapimbo iquec.

⁵¹ Nuquin Papan chienquiocpampid chuinu. Tantiata. Abi tantiaquid unëšabicquidbëdta ënden abi tantiaquid tsusedpabo dada chuca Nuquin Papan menendac.

⁵² Ambi namiaidën abucshun shoncanubi ëshë badedquio bëbedquiac bimboecnuc badedquio unëšesambo Nuquin Papan abi tantiaquido icmendac. ⁵³ Chodquetequid icboedi chodquesa yanendac. Unëštequid icboedi unëšesa yanendac. ⁵⁴ “Adquid icmiac unëštequid nibëdquiendac.

⁵⁵ Ad icnuc ¿mitsishunquio unëštequid istuidpec? Adem-bidi, ¿mitsishunquio unëšmetequid istuidpec?”

⁵⁶ Icsaquid unëštequid nec. Nuquin Papan nadomboen nata quequin chiaid niacquid icash unëštequid matses yanac. ⁵⁷ Adquid nuqui icsho isun Nuquin Papan Nuquin Icbo Esuquidistu chomeshun nuqui cuidenquiocquin aidi icsaisa cuidquin nuqui bëdambo icmebanec. Adoac abi yacnoësh icsaisa unëšesambo nuqui iquendac. Aden Nuquin Papan naindac, quequin, Bëdambocquid mibi nec, Papa, quequin nuqui chuided-chuidedendac.

⁵⁸ Adembidi chuinu. Tantiata. Adenuidi tantiaquin utsi uaqin utsin chuisho tantienquo yec tabad. Adec tabadquin Nuquin Papan chiacpadomboen naban Esuquidistupadquid Nuquin Papan ëbi icmendac, quequin tantiaquin.

16

Utsibo menenun piucquid bedbanaid

¹ Nuquin Papan bëdambo icmebanaid utsibo menenun mimbi piucquid bedbanaid chuiquin dada uaimbique. Isec onquecuededta. Nidaid Cadasia caid yacnocquido Esuquidistu tantiaquido ëmbi chuibanacpadomboen mimbitsen nabanta. Naden Cadasia yacnocquido chiombi. ² Abentsëcshun-abentsëcshunquien mimbi bedaid musucbudcuenshun dominco ushën mimbi musucacted dayun uata. Aton na daëdpactsëc icquidën daëdpactsëc dayun uanubi mitsana dadpen icquidën dadpen dayun uata. Aden musucbudcuenshun mimbi dayun uaid icnuc ëbi choacsho isash, ¿Tedtsimbi menepeba? quenquo mibitedi iquendac. ³ Ëbi choshombic utsibo bëdamboen tantiaquin piucquid dayun uaidtedi mimbi menenun buantan caido isun, Ëmbi isaido neque. Yuedta, quequin dada uashun aido menembi ma buanueshun. Aden ëmbi meniac buanquin utsibo ismetuidpec. ⁴ Adecbidi ambo nidiadquo iquebi, ëbi quenuc mimbi menenun buantan caido ëbëdi nidendac.

Utsi-utsien chuibanaid

⁵ Nidaid Masedonia caid yacno Esuquidistu tantiec iccuededquid utsi-utsiec yacno isedbëquimbi mibi isbëtsenembi. ⁶ Aden isedbëequi mibi isedash tabadebi. Iquenoanquid chonobi mibëd tabadtsiabi. ¿Aid ënëdan nidnu, qesho, adabi utsi yacno mimbi nidmepatsia? ⁷ Nëbi mibëdi yuec tabadtiapimbo iquebi, quiash mibi

yacno nidenquo iquebi. Yucash mibēdi yuec tabadnuec mibi yacno nidebi. Nuquin Papa bunuc adendabi. ⁸ Nēbi padenquo iquebi. Epeso yacnocquidobēd iquebi. Nuquin Papan abipadquid aton Mayan matses meniaid ushē tantiate choan nēuēshquo nidebi. ⁹ Nēmbo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantiapanueshun. Aden chuibansho tantiauidash utsibo ēbi chieshēnquido nēmbo iquec.

¹⁰ Mibi yacno ēbi nidenquo icnubi Timoteyo mibi yacno nideque. Aid bēdamboen ista. Pabado yacpadquiocquid Nuquin Papan namiaidquibidi Timoteyo nec, quec chieshesa icta. ¹¹ Nuquin Papan namiaidquibidi Timoteyo icsho, Ēbēd icquidta nec, quenquiocquin yuedta. Yuedac tabadash, Nidnu, qesho, Ai, nidec nid. Mibi nidsho isash unēsquo iquebi, quequin nidme ma ēbi yacno choanu. Utsibobēd Timoteyo choaic quequin cainec tsadebi.

¹² Nēbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobēdtan istanta, quequin Apodos comapenen chiombi. Adoac, Nēbi Codinto yacno nidte bunenquo iquebi, quiosh aid. Yucash Codinto yacno nidec bēdambo ictsiash, quiash yucash aidi mibi yacno nidendac.

¹³ Icsamane quequin chieshenquiocquin Nuquin Papan chiaid tantiadoneta. Esuquidistu tantiabenquido yanta. Adecbidi, natiatequid icnuc chieshtoenquo yec dayacquo yec tabadteneta. ¹⁴ Adec tabadquin utsi bēdamboen tantiaquin nabanta.

¹⁵ Adembidi chuinu. Tantia. Nidaid Acaya caid yacno Estepanasēn shubun icquido abia Esuquidistu tantiaquido icpondash. Adquid yanshun, Esuquidistu tantiaquid utsibo nashumbanquido nuquibi iquendac,

queshun adobanec. ¹⁶ Aidon namiaido icta. Adem-bidi, comapenen nashumbanquidtedishun namiaido icta. ¹⁷ Codinto yacno Esuquidistu tantiec iccuededquidtedi ëbëdi ictiapimboconobi mibi yacnoësh nëidtedi chosh. Estepanas yec Podtunato yec Acaico yec quec choash puduedsho isash bëdambo iquebi. ¹⁸ Mibitedi chuibanquin aidon unësquiocquidi bëdambo icmiosi. Mibi yacno padpidec nidash puduedshun chuibanquin adem-bidi mibitedi bëdambo icmendac aidon. Aido mibi yacno choacsho isun, Pabado chuibanquin mimbi bëdambo icmiacpaden nabanec tabadta, quequin chuiban.

Esuquidistu tantiaquidon mibitedi tantiaquin chuibanaid

¹⁹ Codinto yacnocquid mibitedi tantiec tabadebi, quequin dada uaquin chuita, nidaid Asia caid yacno Esuquidistu tantiec iccuededquidon cac chiembi. Adembidi, Aquidan aton chido Pidisidabëdtan chui cac chuioaimbi. Adembidi, aidon shubun Esuquidistu tantiec iccuededquidotedishun chui cac adembidi chuioaimbi. ²⁰ Aden utsibon chiaid chuishumbic, Esuquidistu tantiaquid utsi-botedibëd bëdamboec tabadta, caimbi.

²¹ Ëmbi chuibanac ëmbi chiaid utsin dada uashumboed nec. Nëshun bedanquin dënainquin dada uaimbique. Tantia.

²² Nuquin Icbo tantiesa nëbimbobi ma Nuquin Papan comapenen cuidquin ma nësiatequid icpanuna. Adecbidi abi tantiaquido bednuec badedquio Esuquidistu chopashun, quec tsadebi.

²³ Ëbi icsaquid icsho cuidenquiocquin Nuquin Icbo Esuquidistuded Nuquin Papan cuidpanëdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

²⁴ Esuquidistun shubun icquido nuquibi icsho ëmbi bëdamboen isaido mibitedi nec.

1Cod 16:24

60

1Cod 16:24

Padi aitede dada uaombique. Isec onquecuededta.

Esuquidistu Chuiquin Tantiamete
New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

